

MUANNA AKSI

THASIN AH CHANCHINPHA PUANJAKNA THUSUA

Chief Editor:

Rev. Dr. Kh. Khaizakham

Managing Editor:

Mr. Kh. Lalthianzui

Editor:

Rev. Harry Muanlal

Circulation Manager:

Mrs. Kimphating

Associate Editors:

Rev. L. Khupboi Vaiphei
Rev. Dr. Robert H. Vaiphei

+91 8974355695

Contributing Editors:

Pastor S. L. Minlun Neihzial
Pastor Lamneihpau
Miss Ngaiithannem
P/Pastor TL Mang Vaiphei

Consultants:

Rev. Dr. Th. Lamboi Vaiphei
Rev. Dr. S. Lalpi Vaiphei
Rev. Lamkhogin Khaute

ASUNG AH THUTE:

- | | |
|-----------------------------------------|----|
| 1. Editorial | 2 |
| 2. Ni khat khat kigawm la hinkhua | 4 |
| 3. Kum thak 2021 ah kipat in | 9 |
| 4. Khawvel ah hausu pente | 14 |
| 5. Khristmas nungthil kitna | 20 |
| 6. Khrista ah zungkai leh phudet | 23 |
| 7. Bang hi dinga hing la hem? | 27 |
| 8. Thawi leh gingtute | 32 |
| 9. La chawtna gam taphot | 35 |
| 10. Missionary te'n a sawltute a hil lo | 41 |
| 11. I chung ua bek zing gitlonate | 45 |
| 12. Editor masapen Pu Lama Thangvung | 50 |
| 13. Eccii Head Office Te Leh Presbytery | 52 |
- Hotate Tawh Kipak Thu Genkhawmna

Muanna Aksi lakman bank ah thot dington EVANGELICAL ORGANIZATION CHURCH, Ac No. 31703785728, **IFSC N0006182, Code 6182** (SBI, Churachandpur Branch) ah thot ding ahi. MO ah le thot thei ahi. Ala thak nuamte'n kum khat lak man Rs. 200.00 piak masak a ngai hi. Address kim leh kichian tak tawh pekhwam in.

La lakman piaklo kum _____
asum in Cheng _____ ahi tai.

Muanna Aksi phungvukna ah pan theina chuam chuamte:

Patron member : Rs. 3,000.00
Memorial Gift : Rs. 2,500.00
Supporting member: Rs. 2,000.00
Encourager : Rs. 1,000.00

Address:

Muanna Aksi, EOC Office, P.O. Box 35
Hmuia Veng, Churachandpur, Manipur 795128
Email: muannaaksi@gmail.com

*Guest Editorial***PAUCHAPNA**

John 4: 23, 24; Isai 59: 16

Khawvel leh Kochuam in a mamaw pen chu pauchapna, leh pauchap ah Pathian ko mi hih ahi. Isai 59:16 i et ahi chun, dawtpiaktu him him a um lo hi Pathian in mak a sai ti imu thei ahi. Samuel Chadwick chun hitia hin a gen a, "Khawvel ah pauchap mi hi a thupi pen ua, ahinla, thil mak tak chu, zia chu hezing maleu mihingte hi a pauchap diak lo uh ahi" ala ti ahi. Pathian cha, gingtute hin pauchap utna le neilo a, pauchapna ding a le hun i nei ngailo uh hi Pathian lungthim sunatu hilo ding ahi diam.

Pauchapna hi bang ahi diam? Edinburgh ah naupang khawmpina ah chun Pathian mimat, thupi ma ma D. L. Moody chun thu agen a, naupangte chun ngun tak ah ngaitha leu a nawp ziakin zia dawtna hin abul a pan a, "Pauchapna hi bang ahi em, bang ahem a umzia?" tiin a dawng a. Naupang thanuam ma ma te chu zia hun ah chun a thip kei ua,

a dawnhu thei ding uh chu a gingcha bek pua. Ahinla, dawnhu nuam in a khut uh a tung sau sau ua. Moody chun mak a sa ma ma a hi. Tichun naupang pakhat hin zia gual hin a hun dawnhu a, "Pauchapna chu Pathian hepina leh lungsiatna hezing pum ah i gitlonateu thupha chawi a, ama kipakna zawng ah i dawidante Jesu Khrist min ah tut hi ahi" tin a hun gen ah. Moody chun maksa ma ma leh kipak ma ma kawm ah chun zia naupang kiang ah chun, "Bawi, Scotland ah piang la hi ziakin ka kipak hi" atia. Nang le vak ngaitua tia, bang gual dawnhuna la pe diam? Khristian tam zawte hin le "Pathian kiang ah kipakthu genna leh mamawte dawtna (thil dawtna leh tutna) ahi" ati ngei ding uh ginchak a um hi.

Pauchapna ti umzia tak chu bangkim chung ah thuneitu a hina hezing kawm ah Ama Pathian bep cha hi i dawi leh mamaw pen chu ahi ti

hiatsakna ahi. Mawl tak ah gen ah chun i lungthim leh thagau Pathian lam ah ngatsak hi ahi. Lal David ngei khan le pauchapna chu mawi takin Sam 25:1na ah chun zia gual ahin ala gen ahi “Aw Lalpa, nangma lam ka lungthim in ka hun ban to hi.” Zia gual ah chu i lungthim leh i ngaituana zosia ama kiang lam a ngat to ahi chun eima leh i kiang ah hin a um zing ding ahi. Mi kua le a pauchap ahi chun Pathian a dinga nasepna ding hun lemchang a hawn piak a, ama le Pathian ah chun a um hi tina ahi.

Pauchapna tawh kisai ah chun gingu masate kha a thupi ma mau a, ettawn ding le tam tak ei nutsia uh a um ahi. Tuni tiang ah thagau lam nasepna ah mi thupi leh lopi i tite haw hi le pauchapna nasa tak ah mang sektute ahiu a, pauchap mi le a hui ahi. John Calvin chun, “Pauchapna hi Setan zaw theina leh Pathian gam sukletna ahi” ala tia. O. Hellesby chun, “Pauchapna hi van thilhitheina khawvel ah i lakthakna matchak ahi” tin ala gen ah. A. J. Gordon chun, “... la pauchap phawt-

lo ahi chun bawlthei bangma la nei puai” tin ala gen ahi. Hellesby chun, “Pathian chate’n Lal Jesu a suklungngaina pen uh chu pauchapna a ngaisaklo uh hi ahi” ala ti bawh ah. Billy Graham chun, “Pauchap ngailo Khristian chu thilhitheina neilo, a min mai ah Khristian ahi” atia. Watchman Nee chun, “Gingu pauchapna kawng ah a lawsap ahi chun nasepna kawng dang zosia ah le a lawsam vek sek ahi” atia. Martin Luther chu kal sin in khat vei ann ngawl ah a pauchap sek ban in, nisin in abawl dan pangai gual in dakkal thum munthip in pauchapna a nei sek ahi. “Tunin ka sep ding a tam talua hen, sawt jaw diak ka pauchap a ngai hi” ti hi le ama thu gen thupi mama leh mi choutu ahi zing ahi.

I gam leh kochuamte thil in, Pathian kiang ah titakzet ah soal thupha chawi kawmin, i gam sung ah halthakna a hung tun kitna dinga pauchap hi pawimaw hilo ahi diam? Setan gam leh thil hitheina sukbeina dinga pauchap thak kit lo ding i hui em? Tuni hin mani kiphatsan ngam ah pauchap ding Lalpa’n a mamaw ahi.

NI KHAT KHAT KIGAWM HINKHUA

Rev. Dr. Kh. Khaizakham

NISIN LA HUN MAT KIGAWM CHU KUM A HUNG TING A;
LA KUM DING ZAT LA MAT ZAW LEH LA HINKHUA HI
DING AHI

Mihing hinkhua chomcha hih chu aw, achom sam e maw! Mosi'n kum sawmsagi bep in ala kawi a, kum sawmgiat lam chu a dam theite a ding bep ahi tai ala ti ahi. Kum sagi ka hung tinin ka kipak mama a, himaleh, a dam thei kiti lak ah chun ka pang dia aw, ti ngaituana in a zui kit hi. Damsawt le lungngaina bep ahi a ti kit a. A hi ngei mai hi, unau lak ah le a dam sawt sawt chu a suapite vui ah pang hi kit jel, ngai takte sunna mitthi thiak a hun mat a hi bep sek tai.

Tuni ah i ngaitua dinguh chu, nisin i hun mat te a hung kigawm gawm leh a tha a kum a hung ting a. Kum te chu aban banin i hung mang a, i dam laichan chu kum khat khat ah hung mang zo nalai ding ihi. Himaleh, kum bul til ah i hung din hin kum tawp chu kimu kit ngei ina ti ngamna him i nei lo ahi. A hinkhua tawpna ding ngaitua lo hiala hun mangte chu a pha ah ngaih ding ahi diam, ahiloleh ngaituana tawm ah kawih ding ahi diam ti vang gen thiam a haksa kit hi.

Mosi'n, "Ka dam sung

niteu tiam dan ei hil in" ala tia. Zia hin thil tam tak huap ngei ina.

1. I hung pianthak masang leh nung chu damsung ni hiatchian dan a kibang him him pua. Pianthak ma ah chun thagau lam ah mitthum ila hi ziakin kumtuang thil lam him him ah lungthim ila kawi puai. Pathian dawigual ngaituana chang ila nei pua, nisin Pathian lungthim natna bawl bawl lehin le Pathian leh mihiam ang ah kiphatlamna a ki nei puai.

2. I hung pianthak hun ah thil pakhat hung kichian

chu, bang guala Pathian ala do a, a dawilo gual bangjat lawm lawm ila bawl ta diam ti kingaituana hih ahi. I hun beisate pamai sakna lian tak a ki nei tei tei ahi.

3. Bang dinga hing ka hem ti a hung kichian tai. Paul in, “A hingte chu amau a dinga hing hi talo a, a thi sik ua thi a, thokit a dinga a hin jawkna dingun mi zosia thi sikin a hung thi tai” ala tia (2 Korinth 5:15). I Hukdampa a dinga hinkhua mat ding dan chu kibang puana, i theina a chuam chiat a hia, i sep thei le a kibang puai. Himaleh, hinkhua thak chu sep ding tawh piankhawmna a hi sek a, sep ding helo Pathian cha ti chu um thei lo ding ahi.

4. Laphuaktu khatin, “Nisin ah thil pha bawl zingin, i hunteu mang hawi in, chutichun khawvel thim hi phatna’n salvak hitiu” tiin gingtute chu ala chial hi. Zia la hih nidang lai khanglai khawmpi ah kiha sak sek mama ahi. Ahi, nisin ah i thil pha bawl chu i kimvel a dinga le maljawlna a hi ngei hi. Ahin, a poimaw

pen chu, nisin i hun mat te hung kigawmkhawm chu i hinkhua hung hi mai ding ahi.

5. Hinkhua manlul tak ah mat ding le manlo taka mat ding chu eima ah kinga ahi. Nisin ah tel ding apha leh asia a um zing a. Zia nisin ah i dawitelna cheng hung kigawm chu i hinkhua chu hi mai ding ahi. Apha tam tak kigawm la daw em, asia tam tak kigawm la daw em? Nang hinkhua chu nangin la mat a hia, atawpna chu le la mu ding dawl chu la mu ding a hi mai hi.

6. Hinkhua mat hawi tawpna chu a thamuan um nalawm lawm dinge ti hih Sawlchak Paul hinkhua tawpna lam ah a hung kilang hi. “Tuhin chu dikna lallukhuk chu kei di’n kawiin a um tai” ala ti ngam ahi (2 Timothi 4:8). Kihuppi taka a gen ei puai, mi tin in a mu thei ding a hi dan a gen hi, “Kei kiang ah bep hilo in, a hung kitna ngakte a dingin” a ti belap ahi.

7. Hinkhua chomcha hih sep daw ding nei ah dam

dam ihu. “Lau leh kithing kawm in la hukdamnau chu sem bukim tau in” Paul in ala tia (Philippi 2:12). Hukdamna lawdawk dinga sem ding hilo, zia chu a thil thawnpiak ahi. Himaleh, hukdam ah i um nungun hukdam chate i hinau ah sepdaw ding a um ahi.

8. Damsung hun chomcha hih chi pha tu hun ahi kit hi. “Min a tu tapo, zia ma chu at kit ding ahi” (Galatia 6:7). Ginna ziaka hepina ziak liau liau ah hukdam, thil hi ziak hilo, Pathian thil thawnpiak ahi dan ha gen ah gen chu Paul a hia (Ephesi 2:8-9). Himaleh, “Thil pha hi dinga Khrista Jesu ah siam a um” i hinau a gen zom ngal hi (2:10). Zia thil pha hi chu chimchak lo ding, “I kithada lo chun a hun takin at ding i hi ngalun” tiin tilkhauna a bawl zui ngal hi (Galatia 6:9).

9. La dam chan ding chu nang thu ei puai, a petu Pathian thu ahi. Ahinla, bang guala la mat ding ti chu nang thu ah a kawi ahi. Ziaziakchun, i damsung

mat dan dinga kitilkhauna tam tak i Bible ah a um ahi.

10. Malai mithiangthote kha en lechin, Enok chu ama khang ah mite lakin a dam chom pen hi. Himaleh, Pathian tawh kiton ah hinkhua mang a hina hin a hinkhua chu manlul takin ala mang zo ahi. Hezekiah chu Pathian in a hinkhua kum 15 hial ala belap piak a. Himaleh, a sawtna chu pha takin ala mang ta pua, a tawpna chu a hawi ta puai. Damsawt khel khel ding hi le ala pha diak lo a bang hi.

11. Thuthung Thak ah dam chom mama chu Stephen ahi. Thagau Thiangtho ah dim a hia. Chanchinpha hangsan takin a kikopi a, a tawpna ah suang ah selup in a um hi. Himaleh, a selup lai uh muchian leh, a seplumte puan a kengbul ah a kawina pau Saul chu chom khat zaw in a hung piangthak a, Thuthung Thak kochuam phudawktu thupi tak leh, kochuam kingakna ding thugin ziktu in a hung pang ta ahi.

12. Pathian in Stephen chu chomcha ala mang a, Sawlchak Johan chu sawt tak ala mang hi. Ahinlah, Lalpa ang ah chun a hinkhuau chom leh sau in ki en ta puan tin, hinkhua a mu dungzui ua a ginumnau, hinkhua bang gualin a mang uh em ti ah chun ngaitua hi tanau.

Kochuam khang thu ah hin le Pathian mi mat te hih a kum jat uh et in mak sak ding a tam hi. Ka la ngaisang mama mi thum te chu tangval lai ah kimangtum ngawn ahiu, David Brainerd, Henry Martin, Robert Murray McCheyne te hih. Himaleh, khangthak tam tak, a khang a khang ah chodawktu ahi zing ui.

Chomcha cha a mat a um zing lai in sawt tak ala mat a um kit ui: Billy Graham kha kum 99 tiang ala dam sak hi. Na tampi semdawk dinga a guat ahi ziak a hi. John Wesley ngei kha le sawt tak ala mang hi.

Eigam en leuhin,
thian mang salpha

Kamzathang, Makuri Naga te lak ah Burma gam ah ala puilut a, sawt lo in a kianga chawldam dingin ala pui hi. Ahinla, tangval laitak ah Lal Jesu a dinga hinna a la tuakdawktu chu khangthak tam tak chodawktu in ala mang ahi. Rev. Rothanglien Hmar a hi leh chu sawt tak a mang hi. IAS ki resign ah Karbite lak ah missionary chu Pathian in damsawtna in ala maljawl hi.

Pathian vaihawm dan leh ngaitua dan kuama'n hekim zo puai tiu. Ei chun dam nalai leh Pathian a dinga a sep tam ding dan i ngaitua a, pammai i sak mama a um zing hi. Khangthak tam tak zo ngei dinga kineppi um, pianthakna thupi tak nei, thiamna sang tak nei, mi thuzaw thei taka thu gen thei hi ngalin gilpi cancer natna nei ah ala thi ta, lekhabu thupi tak, *Seeking Allah, Finding Jesus* ala ziktu Nabeel Qureshi chanchin haw bang hih i et leh, i hiat zaw lo uh Pathian lungthim i vak muu ahi.

Zia tiang ah hin vak
hiat thei khat vang a um

tai. Bangchan i dam em ti hih a poimaw pen ei pua, hinkhua Lalpa ei piak hi bang gualin i mang em ti a hi jaw ahi. Zia hechiente chun Lalpa pawm thei ding bang ka sem diam ti a hawl luai luai uh ahi.

Nangma hinkhua chom leh sau ding nang thu hilo ahi. Himaleh bang guala la mat ding chu nang thu ah Pathian in a kawih ahi. Nisin, tha sin la mat te kigawm in kum bangjat

ahem chu hung mang ding la hi. Zia kum hung kigawm chun la hinkhua chu a siam ahi. Zia hinkhua hih lul takin la mang diam, manlo takin la mang diam, a siamtu Pathian in dawitelna hung pia in, la khut in a kawih ahi. La Pathian a dingin hinkhua chomcha hih mangzo dingin kingaitua in. Khut ngawn ah Lalpa tuak dingin Ama'n ei dawipuai, kipakman piak ding tawh eila ngak zing hi.

YCO EVANGELISTIC CAMP 2021

March 11-14, 2021

At: Jacob Taona Muol, Old Gelmol

Speakers:

Rev. Dr. Kh. Khaizakham

Evan. V. Lienthuom

Director-Chief Counselor:

Evan. Lunminthang Neihisial (Thangneo)

(Kum lui ah ala kibawl thei talo ahia, hun pha
i neisun uh

ahi leh le kisik lo dingin pan gua chiat hitiu).

-Camp Committee

KUM THAK 2021 A KIPAT IN NUNU LEH PAPA THU MANG TA'NG KA

(Thup. 13:1-3; Eph. 6:1-3; Exo.21:15)

~Pastor Lamneihpau

Tu kum thak chu hiatlo kal in tha khat ila mangliam kit man tau a, tu hin a tha nina chu man pan pan kit ding ihi tau a, Lalpa chu i chung un apha; kipak thu Pathian kiang ah i gen zing ding chu i bat ahi zing ziang ahi. Ningkum thusim a tung kuama chan zia gual thil pi hi hung tung phut ziang ina ti i gelphak lo lam tak in March thatawp lam akipat in khovel pumpi ah hipi (natpi) a len zia in hinkhua a ngaina dan in i mangthei ta puau a, khovel pumpi chu patauna'n a dim ziang ta ahi. Tu kum le hiatlo gam, gam i chia khak nailo nau gam ah khual zin ding i hi zia un, chingthei tak leh pilkiaua a i khualzin uh ngai ding ahi. Achutiloleh, tuasiat tuak thei zing ihiu. Khanglai tha hat ka hi ti'n kisuang ziang ki'n; miphiatkal ziang ah le la hinkhua kha bei ziang thei ahi ti hemil him him ki'n.

Tuni hun ah khanglai te'n i hiat diu a ka doi ma ma ziang chu ahileh, thilsui mi ten, "Khovel ah hin nam tamtak te hi ala um ngei ua, ahinla tuni hun ahin zia namte chu; nam ti kham le um malak sang un a thigam tau ti'n a suidok sek ua; ahiloleh tawmcha bep a um ham-ham ui, atiu ahi. Amau chu kum tamlo cha sung in zia nam te chu ti ahiu ti leh sui ding um talo in mangthai pai ding ahi tau

ti ding atam ma mau ahi," a tiu a hi.

Zia namte chu bangziak a mangthai ta leh mu thei ding tuni um talo ahi mai diam uh? Pathian in nam khat, phung khat, beh khat, hi dinga a siam hi ngal a, bangziak a thi gam leh tuni sui ding um talo ahi mai diam uh maw? La ngaitua em? Lungkham um tak ahi maw? Zia nam mangthai ta tawmcha um nalai sun te chu va sui man puai tiu

in, ahinla, a ziak khenkhat hi ding ah ginchak te chu, a siamtu'u Pathian ngaisak lo, ju leh sa le khamthei kani/nganja ha nek talua ti haw leh mihiam hi ngal; sa le gal a ki entua a ki bulu ah a- za, a- siing tel a gamsa gual a kithat gam mai ti bang le um sek dan uh ahi.

Ahinla, tuni ei uh namte'n leh khang ki bansam leh khang sui ding um talo ihi nop lo ua chun tuni gingtute leh a diak in khanglai te'n i hiat diu a mamaw ma ma ziang chu, Bible inle nu leh pa za bawl di nu leh pa simmaw lo hial di ati hi ihetmil lo hial diu a ka poimaw ngai ma ma te lak a pakhat chu ahi. Zia a nuai ah thu te akipat hi khanglai te'n lungthim leh ngaituana ki sang danglam chiat hitiu ti hi, ka hun pauchap piakna ahi.

Zia a nuai ah hin lekhatthot nu leh pa apat kizik ka la sim kha; lungkhawi um ma ma ziang ka sa, zia thu hin khanglai nu leh pa nei la hi naklai a, ngaituana a phalam ah la nu leh pa chung a la nei thei

diak lo la hi chun ngaitua um ma ma khat hi di la ti hangsan tak in ka gen ngam ahi. Zia lekhatthot chu nangle khoimun a la um tak inle ngaitua det det pum in ala sim tia le; zia lekhatthot chu zia gual a la kizik hi ahi.

La Nu leh Pa a kipat in,

Bawi...Ka hung upat deu phatleh dawtheina tawh lei hiatthiam di ka kinem hi. Bangma sem zo talo, thagum le neizo talo a ka hung um phatleh, nang zia chan hi la hung tun theina dinga ka hatlai hun zosia gim leh chawl le khawk sa lo hial ah nang khualna a, ka hatlai ni a la mangtum kei ka hi ti hi geldok zing ziang in in aw.

La nu leh pa tha sang ah, Pathian lau pum a la hung khawsak to zel ding hi ka hun doisak ma ma uh ahi. Pathian ah kipat maljawlna kiti hi, La nu leh pa ah a koi ahi tih hemil lo in, la nu -la pa la hun za a, la hun kipaksak ka kinem ma ma ziang uh ahi. La leichung Pathian la nu leh pa ka hi ziak un ei suk thasiat di hun gaw him him

ki'n aw.

Ka hat taak lo ziak ua kisanlana tawh dim ta ka hi ziak un; ka khomunau (mit) a hat tak loh ziak a, annkuang ahem ka sukkiak ua, me vel ka hun sukbuak khak ua leh le, ei hun gai him him ki'n aw. Zia hun tak chuleh kei uh la nu leh pa'u hi thase vak ma-ma ziang ta ka hiu aw Bawi.

Ka khawhetnau a hung buai a, la thil gente'u he vak-vak ziang thei lo a ka um hun phat ua leh, 'BENGNGONGNU/PA' ti'n ei gai mai hial kiu in aw! La hun gen kit zel em; ahiloleh a zik thaw hem in lei hun hetsak ding uh ka kinem hi aw! Ngaidam aw bawi, ka kum uh a tam ta a ahi.

La neulai a dingdet theilo, chiathiam nailo la hi lai a, la khutte tu a ka hun chiapi zel sek gual in ka teek tak ziak a, ka khupte, ka gu-leh-chaang hatzo talo a, dindaw ziang le haksa ka sak phatleh nunnem tak in ei kai ding zel sek in aw!

Ka gensa gen-gen ziang sek hileng le ei chimchak

him-him lo in lei ngaithak piak zel ka kinem ahi. Lungsiat tak in ei nuisan mai lo in, ei simmaw bawl him him kin aw. La neulai a naucha milim la doi ma-ma ziang a, la nei masangsia ka kiang a la hun don a, la hun don-don mai a chimchak lo hial a ka hun ngaithak piak lai kha la he nalai em Bawi?

Ka hepi bawi, ka tektak ziak a kizut zawl zo talo leh kisuthiang zo talo ka hi ziak in ka gim hi a namse vak ma ma ziang ta, la ngaidamna ka hun don ahi. Lungsiat in kisil, kisuthiang ding in ei pawngnaw him him ki'n aw, taksa hatzo talo ka hi ziak in khovot phalbi hun hi thuak lel ma ma ziang ka hi aw bawi! Taksa hatzo talo ziak ma in damlo leh tinat le a bailam ma ma ziang ta ahi, ei hethiam inla ei lungnat khum ki'n aw. La neulai a kisil la ut sek pua, nunnem tak alang-alang a ka hun del vel vel sek lai kha la he nalai em Bawi? Genhak thim ah ka um phatleh le, 'a upa ta ahi' tia zaidaw tak ah lei etkol ka kinem ma ma ahi.

Chuleh, hun hawmthaw tak a, buai thei ma-ma la hi ti le ka hun he nai, hilehle kei bep a sun nitum tum a chim tak a um sek ka hi ziak in; la hun chomcha bek kei a ding ah la hun suk awngthawl sek ka kinem tun-tun ahi. Ka gen utte nang a dinga bangma lo mai mai, chimchak um ahi hial leh le lei chutpi him-him sek in aw bawi... ka chim sek taluai. La neulai a la kihelna vante chuleh la naucha milim thute la hun gen gen sek lai ah, chimchak lo hial a ka hun ngaithak piak sek lai kha la he nalai em Bawi.

Damlo tho zo talo a lupna ngak a ka hung um phatleh hepina leh zaidawna tawh lei etkol ka kinem hi, ka ut mawng hilo a, kei ki enkol zo talo ka hi ziak a, ka zun-leh-ek lupna chung a ka che khak pal a, lupna chung ka suk pawlche khak pal tak hial inle, 'Pelpul an, nemnum an!' ti'n ei lungnat khum ziang kin aw, ei gai him him kin aw bawi. Ei ngaidam in aw ka kitup zo ta ma ma pua ahi aw bawi.

Sun leh zan, kholum-

khovot khawksa lo a, la zun leh ek hun suk thian piak, la zundap te a hun hun ah hun then piak sek kha kei ka hi ti hezing in aw bawi. Ziaziakchun zia leichung ka laicha kuan tiang nasan in lungsiat tak leh zaidaw tak a lei etkol ka kinem ma ma ahi. Sawt hun dampi zo talo di ka hi. himaleh ka thi hun a hungtun phatleh, thina hangsan tak mai ah ka maitua theina ding in ka khut te tu kom a lupna kiang a lei umpi kinem ma ma ka hi aw Bawi. Ka hun ngai taluai, ka hun la abei dikuan ngut-ngut ahi ta.

Hilehle, lungkham him him ki'n, ei Siamtu leh ei HUKDAMPA tawh ka kimutua phat ua leh awlcha'n a bil buk ah, 'Lalpa maljawl in, a nu-apa lungsiat tak a enkol ahi' ti'n van akipat in maljawlna hun dot piak nalai di ka hi. Bawi lei lungsiatna leh lei etkolna te ziak in ka kipak hi. Ka hun ngai taluai.

*Keima'u,
La Nu leh Pa*

Tekpi, tekpu bang la

law em? La nu leh la pa bang la law em? Hung tek leu le la hepi nalai lai diam maw? Ahiloleh, la simmaw kha tawl mai diam maw? Noksak la sa mai diam uh maw? Pi leh pu, nu leh pa hepi ding hun chu, ‘TU’ hi ahi; ki khelsak man kha tawl inla aw. “Maljawlna kiti hi la nu leh la pa kiang ah koi ka hi aw” – Pathian.

Thutawpna: Tuni’n khanglai zia thuzik sim kha zosia te ki ngaitua thak hitiu, Pathian in maljawlna leh vangphatna hih inu leh pa teu kiang ah ala koi ahia, zia chu i sukkhial uh ahi chun mimal leh nam

vangsia te chu hi mai ding i hiu. Vangsia bep le hilo in, nam leh phung leh chang, leh isuante nasan tiang ah sumangthai thei tu Pathian ahi ti hezing in, tu-leh-tu hin Pathian in a paap ei chansak lo ziak mawk bawlbawl ziang ding a hi puai ti hemil puai tiu.

Tu hun ah khanglai te’n inu leh pa te’u thase tak leh mitthi luang pum-pum in thanmual liam sak da him him leu hin, i innsung uh, i khawtang, i namsung, i kochuam leh i nupa’n innchen uh Pathian in matheilo in hung tung ding mai ding ahi.

GENDAW LEH ZIK THAW – hiti jaw leh a pha diam?

1. Min bul ah Pu, Pi, Nu, Pa ti haw i zik tak ua leh, lakchom ahi lo ziakin full stop (.) koi lo hi leh. Pastor leh Upa zik tak leh le koi lo ding ahi. A kilachomte Rev. Tv. Nk. ti haw hi Reverend, Nungak, Tangval lakchom ahi ziakin kikoi sek ahi.
2. Kipak thu gen tak leh, “La hun man tam tak uh hung nusia in” a kiti sek a, hun man tam tak chu nutsia thei ei pua, “hung pia in, ahem hung khen tha in” ahem kiti jaw leh.
3. “Kipak thu ka hung gen hi” ti ziang a pha jawi, “kipak thu ka hung gen hi henlah” ti sangin.

KHAWVEL AH HAUSAPEN TE

Rev. Dr. Kh. Khaizakham

Zia thupi hi la vak mu in la lungthim ah hung kilang ngal ding chu *Forbes* ah mi hausa list ah kitiang tha ziang multi-billionaire haw, kum bangzat ahem zaw leh trilionaire hung hi thei ding hiala a ginchakteu khu hi ding ahi. Tulai taka a hausapen pathum kizom chu Jeff Bezos, Elon Musk, Bill Gate leh India ah hausa pen Mukesh Ambani te pi khu, khang tul tul ziang, akimvel genthei deu deu lai ah amau hau deu deute chu ahiu. Jeff Bezos zia bang lawm ah a hausakna a khan ziak hi, ama business *Amazon* kiti hi tuhun buaina tawh kituak ah lemchang ahi ziak ahi. 2026 kum ah trillionaire hung hi thei dinga ngaih ahi. Khen khatin *SpaceX* ah CEO Elon Musk hung hi jaw dingin a gingchau. A hausa jaw le hung kitheng theng ding a bang ui. (Trillion: 1,000,000,000,000 a hi hilhial ei!)

Tuni hin ziate chu gen gua kei puai. A ziak chu kumtuang gam tena ah chun mi chaga pen le hi thei ahi ziakun. Jesu a nei lo ua leh kumtuang gam ah chun ni khat um man ding le pezo lo ding ahiu. Jesu thisan jal bep ah kilut ding ahi zia kin. Gingtute i hausaknau thupi pen chu zia kumtuang gam ah chun kumtuang ah i um theina ding man chu *Paid in full*, a ting ah piaksa ahi.

Tha thum vel ah khan nungak ni leh tangval khat in, “Aw a nuam ngei aw” ti

Zou pau ah a hung sau a. A phuaktu leh a satute’n hinkhua ah a hiatchian uh hi tei dingin ka gingcha’n, kipakpina sang tak ka lan hi. Hauminlun Zou, Mary Vaiphei, Nei Joicy Khongsai, mi bangjat khawikha ah la sa la hiu em ti hih helo ding la hiu. Zia la apat zia message hi le hung piang ahi.

Bible apat mu thei leh tulai gingtute lak ah le um thei ta mi hausapente:

Abel: Anu leh apa i ngaitua leh chuti tak ah

thagau ah chu suan umlo ahiu a. Thumatlo ziaka Eden apat hung kinaw dawk ahiu a. Zia Abel cha hin khawi ah a zil a dia aw! “Abel inle a belamte lak ah piang masa pen pen te chu a hun lan a, Lalpa chu Abel leh a thillate ah chun a kipak a” ti cha hi maw! A u Kaina thilpiak ah vang Pathian a kipak puai, pha taka a bawl lo ziakin. Ngaitua tia, Pathian in lungthim na takin Adam leh Evi chu taksap ding umlona huan Eden apat a hung nawdaw nungin zia Abel cha hin Pathian lungdamna a hung bawl ahi. A pha pen petu hin van ah a go ding kikhoh dan a hung he pai ngal ahi hila! Thuthung Lui chu Abel thilpiak ah hung kipan ahi. Min Pathian a hepi chun a pelo thei puai. Hebraite kianga lekhathawt ziktu chun Abel chungchang ah chun, “thi ta maleh ginna ziakin thu a gen zing nalai ahi” ala ti ahi (Hebraite 11:4).

Noah: Genesis bung 6na hi pan pan a, Adam suante hi chu aw, Pathian lungthim a vak suna nalawm lawm uh e! “Lei chung ah mihing

ala siam tak ziakin, Lalpa chu a kisik a, a lungthim a na mama ziang tai” (6:6). HIMALEH! “Himaleh, Noah chun Pathian jangaina a chang hi” ti hih a hung um khel khel ahi (6:8). Noah, pa man tam tak, “midik leh ama khang ah demna bei ahi: Noah chu Pathian tawh a kivop zing ui” (6:9). Chate a dinga hausakna thupi leh detdo pen chu Pathian tawh kivop zing pa nei hih ahi.

Unaute, kingaitua thak a ngai hi. Tu tiang ah zia tiang i hung tunnau hih Pathian tawh kivop pa ila nei zia kuh hilo di ahem? Pa umlona insung vang Pathian in a vaihawmpi meithaite jalin a inkuan dopsang in a hung um sek hi. Abang hileh, pa umna insung kingaitua thak a ngai hi. Noah chate hausakna pen chu Pathian tawh kivop pa a nei uh a hi. Noah hausakna pen chu cha thumang a nei hih ahi. Tichun, a kihukhinna dinguh kuang a tuu a, khawvel ah mihiamte manthai gam lai ah chun hukdaw in a um uh ahi. Tu tiang hin le inkuan kim ah kumtuang gam a dinga kisiam fel te

khel ah en-um a um lo ahi. Hausakna thupi pen chu kumtuang hinna nei hih ahia, inkuan kim ah neite khel ah hausa a um puai.

Abraham: Midangte a dinga maljawlna hi thei te hih a thupi nalawm lawm uh e! Zia dinga chun Pathian kona guala kipiak daw, kiphah a ngai hi. Genesis 12:1 ah Pathian kona ala pom Abraham apat hin khawvel gitlo ah mang nung tatna dinga kinepna ni chu a hung suak hi. Zia thumatna ah hin, thumangtu a dingin haksatna gen sen lo um maleh a thumatna ga ah chun Messiah hung pianna ding nam thak chu a hung piang tai! Zia hih gen zom ding hi leuhin pek tam tak in le dawl lo ding ahi.

I gen nop chu zia hih ahi. Ei le midangte a dinga maljawlna hi ding chun thumatna a poimaw ding ahi. Tuni ah thagau lam ah mite a dinga maljawlna tuntute hi Lalpa kona ala dawnhu zia uh ahi. Missionary thupi tak takte, gam tin ah chanchinpha ala pawlutte chanchin tam tak

ila sim tau a. Zia gual khel khel ah thupi taka Pathian in ei mat khel khel ding a hi diak puai. Eima kham kham ah thumatna ziaka mite a dinga maljawlna ki hi thei ahi. Mite a dinga maljawlna hi dinga la hinkhua la mat chun mi hausapen te lak ah sim khawm in um ding la hi.

Thuthung Lui ah gen ding tam maleh Thuthung Thak in vak galkai hitiu.

Mari: Mari'n "Lalpa suaknu" a hi dan kihiat in, thu ala mang a, khawvel Hukdampa hung pianna dingin a naubu ala tuak dawka hi. "Vangpha nu" chu a hi ta mai hi. Khawvel ah vang bangma a lawkpi puai ti lo thei lo ahi. Hukdampa Jesu'n a thi ding kuan in a nu chu Johan khut in a vak pedawk ahi. Zia thu kimjaw hih *La Kinepna Zosia Bei Nungin le La Pathian a Um Nalai Hi* ti lekhabu ah khan a um hi. December 2020 *Muanna Aksi* ah a hung kisua kit hi, gun takin ala sim thak in. Mari hausakna hi kumtuang gam ah hiatchian hi tana.

Bethani khua ah Mari:

Bethani khua ah Mari kiti nu'n Lal Jesu thau gimtui a hung nuna hih akhang khang ah kitilkhauna ahi tai. Zia thau gimtui a hung nu *spiknard* hi a mantam dan chu numei khat in kum khat sung ah a nikhawtha man tawh kituak ahi tiin hilchianna a ki mui. Alabaster bawm ah kikawih ahia, a tatkek a, a hung nu ahi. A kimvel ah umte chun pammai a sa mamau hi. "Bang atia hiti suk pammai mai mai ahem?" a tiu ahi. Lalpa muchiante'n bangma a it lo lai un, a muchian lote chun talua a sa sek him uh ahi. Pathian a dinga kiphalte hih a hausapente lakin pang inau.

Ka lungthim khawi mama khat, kum sawm masang lam ah khan Chennai ah Jubilee Memorial Bible College ah camp khat ah thugen in ka va chia a. A compound a lian mama a, a man ding hisap ah chun a crore tel ah sim hi him him ding ahi. Zia chu nidang ah kochuam puitu minthang tak PT Chandapilla in ama gam a thawn ah ala piakdaw

ahi. Ama ahi leh a zi'n a thi san nungin zia college compound ah student damlo um tak leh a etkolnau dispensary ah chun a thi ding kuan in a enkol ua, zia mun apat chun van ah a go khawlsa manaw in Pa kiang ah chawldam dingin ala chia tai. A thupi hih ka sa mama ziang ei!

Martha suapinu Mari: Luka 10:38-42 ah hin Martha'n Lalpa Jesu chu a in ah a kolut a. Thil tam tak a buai pi ziakin Lalpa thugen le a ngai man puai. Buai a kisa mama a, a suapinu Mari chu panpitu dinga sawl dingin Jesu kiangin a gen hiala. Jesu'n a dawnhuna chu a ginchak lo lam tak a hung hi tai. Thil khat a poimaw pen Mari'n a tel dan, sukbuai lo ding ahi a ti ta mai a. Mari'n Lalpa kengbul ah chu'n a thugen a ngaih chu "chan pha" a ti ahi.

Martha'n Lalpa nek ding a buai pi hih a poimaw lo ei puai. Himaleh Lal Jesu ngaisak man lo hiala a buai hih a pha ei puai. Tulai hin le zia guala bawl khial ki um ding ahi. Lalpa kengbul ah

hun mang manlo, ama gen ngai manlo jen ah a nasem ah buai i kisak uh hih Lal Jesu lungdamna hilo thei ahi.

Nisin a hun khentha ham ham a, Lalpa kengbul ah a gen ngai thei zingte hih mi lungawi leh kipakte ahiu. A na la seppa kengbul ah hun mang man lo jen ah la buai hin nangma kipakna a hung piaklo bep hilo in la Lalpa le kipaklo ding ahi.

Zia numei pathum tepte taak mamate apat ah i vak mu thei uh chu, khawvel ah hin lungawihna ding leh kipakna tak tak ei pe ding hih mun dang ah mu lo ding ihui. Bangkim Lal Jesu tawh kizom a hia, Ama tawh kisaih ahi sek hi. Ama pang lo ah kipakna tak tak a um pua, lungawihna ting le a um puai.

Achung ah hung kigen la apat khun poimaw ka sak diakte ka vak ladawk hi.

“Lam-etna ka nei, lungnopna ka nei, leichung nopna a tepi ding um lo” a tia. Ahi mama e, Lalpa ah lungnopna chu khawvel

ah a tepi ding um lo ahi. Mihiamte hin vak hethiam ta mai leu chu khawvel ah hin lungnopna hawl lo hial ding ahiu a. Zumun limna, jawnthanhuaaina, hausakna ti haw ah mu thei hilo ahi ti hiatchianna dingin hun a lut mama sek ngal a. Mi hausa leh mi minthang tam tak hin numei leh pawсал nopchenna ah lungnopna a hawl ua. A tawp in kana guam a tung tho tho ui. Pornography po ah kisuklungawih gua khawvel in a tam hi. Zia kisuklimna luaksuak um taka hin lungnopna mu lo hial ding ahiu. Jeremiah in “tui kiting thei lo tuikul” ala ti chu a hi bep hi.

Lalpa ah hausakna kiti hih kuama pu leh pa go hi diaklo ahi ngut hi. A hawl ngap tapo in zia go kiphungu hi mu ngei inau, Lalpa ah hausakna tak tak chu! David in, “Lalpa chu ei chingpa ahi, kei tasam pua’ng ka” ala ti hil hial ahi (Sam 23). Khawvel in kipakna a tasam a, lungawihna a tasam a, thamuanna a tasam a, hawl nau mun a dik lo ziak ahi. Zia zosia muna mun chu “Lalpa ah” ahi. Ziaziakchun,

Paul in, “Lalpa ah chun kipak zingun” ala ti ahi. Thil dang ah kipakna chomcha cha a um thei hi, himaleh a um den ding a um puai. A um den ding chu “Lalpa ah” bep ahi. A ziak chun Ama chu zani, tuni leh bangtik ah le a ngaih ngaih hi zing ahi.

Lal Jesu bep ah kinepna a um a, lungkimna a um a, kipakna bukim a um hi. Mun dang ah la hawl leh atawpna chu beidonna leh lungkhamna hi tho tho ding ahi.

Tulai hin la ginchak sangin zia guala Jesu ah a hausakna kimuchian a lungkim mama hih a tam hi. La mu khak lo chun mulona ding mun ah la hawl ziak hina. Mu la guat lo ziak le hina.

Mawl mama leule zia hausakna muchiantute chu nang sangin a piljau. Chaga jaw mama leu le zia hausakna muchiantute chu nang sangin a hausa jawu. Bangma neilo maleu le zia hausakna muchiantute chun nang sangin a nei tam jawu. Niam mama ziang leu le zia hausakna muchiantute

chu nang sangin a sang jawu. A thuguk chu Paul in a la genchian tai, “Bangma neilo gualin, himaleh bangkim nei bukim ngalin ka um jawu ahi” (2 Korinth 6:10).

A vaigei ma hin ngaitua chianin. Tuni ah la ngaisang mama haw hih a hawm ngawn ala hi thei ahi. Lazar tawh kigen khawm mi hausapa kha ngaitua in. A damlai ah a minthan ding siat tawh, a thi nungin chu “mi hausa kua ahem khat” ti a hi bep tai. Lazar kha vang a damlai in a min hia le tam puanau, “khutdawpa” tia kihia bep hi ngei ina. Himaleh, van ah min chuang a hi dungzui in zia chanchin kizikna ah hin le a min a hung chuang ahi. Khawvel ah minthang tak, van ah hiat lo hi sangin, khawvel ah mi hiat kham lo, van ah hiat a thupi jawi. Van ah chun hiat khamlo kiti um talo ding ahi. Aziak chu man tam taka tung ding ihiu, Lal Jesu thisan ah tatsa, Pa Pathian lungdamna hi chiat ta ding ihiu. Zia dinga tepte ah um ta la hi chun mi hausapen te lakin la pang ahi.

Khristmas nungthîl kitna

A HUNG PIANG JESU BANG LA LAW EM?

~Pro-Pastor T.L.Mang Vaiphei

Thumasa: Khawvel hukdampa dinga hung piang nausen Jesu pianchampha Khristmas i mang zo tau a, majawlna tam tak i dawn chiat uh kinep a um hi. Khristmas mangzo i hi tâknau tawh kitawn in a hung piang nausen Jesu nang in bang la law em? La muchian em? Bethlehem tung zolo ah Khristmas sa bêl bul ah mang zo mai la hem? Ahiloleh, Bethlehem tung zo lo ah Khristmas pâwlbûk tiang bep ah mang zo mai la hem? ti ngaitua thak pum in, zia a nuai ah thu tamlo hi .vak nung ngaitua thak kit hitiu

A HUNG PIANG JESU KHA-

1. Judate chun a dawî puau:

A hung piang nausen Jesu kha Judate lal ding ah hung piang hi maleh, a lal ding un a dawî puau a, “Kaisar lo ngâl lal dang ka dawî puau” ti in a la nawl ta mai ua, Judate lak in Jesu'n mun a chang zo puai.

Tuchung Khristamas la matna bêk a hi Jesu muchian in, la kumtuang lal leh hukdampa dingin la hinna'n mun la pe tak tak ta em?

2. Lêng Herod in tha ding a guai:

Judate lêng Herod

in ama thasâng ding ah lêng dang a hung piang hi ti thu a hiat in, a chawldam thei ta pua, nausen chu mu ah a tha theina ding in chibai bûk nuam dân ah kinei in, mi pilte kha nausen gunchu tak ah va hâwldawk ah ama va hil kit ding in a vâithâk hi.

Lêng Herod khawvel hukdampa ding ah hung piang Jesu tha gaw maleh, a lawsam a, hukdamna nasep a hun sêm bukim zo tai.

Unau, tuchung Khristmas bêk a hin, itsîkna, thangsiatna, huatna, mudana, lungput la neite Jesu jal bêk ah nutsia

gaw nailo la hem? Jesu muchiantute hinkhua zia gual lungpût hi a um thei ngai lo ei vei! Jesu muchiantute chun, hepina, lâinatna, khawtuana, ngaisakna leh mi dangte â dinga maljawlna hi dingin a hinkhuau a lân sek uh hilo a hem?

3. Simeon in Jesu a muchian hi:

Jesu mulo ding lâu ah pauchap hial ah pang Simeon in vâng a tupna gual in Jesu a muchian a, “Lalpa, tuhin chu la suak hi la thu gual gual in, thamuang tak in chiasak ding la hi tai; la hukdamna chu ka mit ngêi in ka mu tai” ala ti a hi. Nang le Jesu muchiantu la hi chun, Simeon thugen hi kikawppi thei mailo la hem? A hung piang nausen muchiantute a kipak lo a um ngai puau a, thamuanna bukim tawh a kilekit sek ui.

Ngaitua in:

Tu kum hi nang â dinga maljawlna kum a hi dingin leh a hilo dingin chu - a hung piang nausen Jesu ah la kawi dân dân ah hung kinga

ding a hi. Jesu muchiantu la hi chun, tu kum hi nang â dingin -

- La thamuan pen kum hi'n tin
- La lung-awi pen kum hi'n tin
- La kipak pen kum hi'n tin
- Maljawlna la dawn pen kum hi ngêi ding a hi.

Jesu muchianlote â ding in:

Lungkhamna kum hi'n tin

Khawvel buaina a sân po leh a lungkhamna kibelap deu deu intin, khawvel thil ah kisuklungkim gua'n tin uh, a lungkhamnau pung deu deu ding a hi.

Khawvel thuthang lamdang a hiat tamna'n launa leh thâwmhauna mun in puilût intin, a hinkhua beidawwna'n mangzo ding a hi.

Thutâwpna: Suapi dawitakte haw, tuni la hinkhua belap piak ah la um hi Pathian jangaina ziak bep a hi ti hia'n la, Pathian hepina la chan hi

phatchuampi lo ah chang la hilona ding in, Khristmas hun ah hukdampa dinga hung piang Jesu muchian lo la hi khâk tâk in le, a kikhel sâu takluat ma'n Jesu muchian ding in gunchu tak in a la hâwl in aw. Tu kum hi bang gual ah thil hung um jel ding a hem ti hiatna i nei

puau a, himaleh, bang gual thil hung tung maleh Jesu muchiantute a buai ngai puau a, Jesu ah thamuanna bukim a nei ui ti hia'n la, a hung piang Jesu la hinna lal ding in pawm mai in.

A hun hepina ziak ah gan ankuang ah hung kisial nausen Jesu la hinna'n bang la law em? kingaitua thak in.

EOC PASTORS TRANSFER & POSTING FOR THE TERM 2021-2014

1. Lamka Chung Bial: P/Pastor Lunneilal (Council hun ah ordain ding)
2. Lamka Nuai Bial: Pastor Ph. Kaiminlian
3. Imphal Bial: P/Pastor TL Mang (Council hun ah ordain ding)
4. Leimakhong Bial: Pastor SL Minlun Neihstial
5. Jiribam Bial: Pastor Lelkap
6. Kailam Tang Bial: Pastor Kamthiangin
7. K. Tonglon Bial: Pastor G. Manga
8. Delhi: Pastor Khamlemlal
9. Shillong: Pastor James Th. Minlun
10. Bengaluru: Pastor S. Thiankhanlal
11. Chennai: Pastor Lunpi Neihstial
12. EOC Central Church: Pastor ST Robert
13. Pastor Lamneihpau: EOC Secretariat ah attached
(HQ programs coordinating, Counseling,
Muanna Aksi editing assistant, term khat sung a ding ahi)

Sd/- Rev. Harry Muanlal

Executive Director

KHRISTA AH ZUNGKAI LEH PHUDET

Kolossate 2:7

~Ms. Ngaithiannem

BTukum a dinga a thanina tiang ei puitu Pa Pathian lopina leh chawihoina sangpen i pia masa ahi. Tuni hunte hi mitamtak in munuam leh chang nuam maleu le amau dawitelna um keilo in thina than mual a liam zung zung lai un, nang leh kei hi i phat leh hawi ziak hilo in Pathian in gen leh matnawpna khat ei nei ahi ti i hemil lo ding uh ahi. (Kum thak mu hi ngal a, tha khat sung ah ala mualliam hi le a tam kit ta nalawm lawm e, ti ngaitua lechin, ni khat bep hinkhua Lalpa'n ei belap (!piak hi le kipak thu gen gen ziang ding ahi ei

Tukum thupi ding ah “Khrista ah zungkai” ti hi tuhun a dinga Pathian in pawimaw a sak ziak ah zia thupi hi hotute'n a hung bawl uh hi dingin ka ging cha ahi. Khrista ah ki zungkai detna lo in chu gingtute haw a dinga lampi dang umlo ahi dan ngaitua thak in pan i lak ding uh ahi.

I chennau khawvel gam Government in eipui dan leh i hung khawsak to zelna ding uh hawle bang gual gual ah gingtu te haw chung ah vai a hung ki hawm to zel diam uh ti i ngaitua phat leh hiatdaw zaw ding gual ahi puai.

Bang tikawng hem ah Khristiante haw hi sukmanghai ding ahilo leh sukduda ding ti hi i gam vaipawte haw lungthim vang ahi zing tai ti hi mimal tin in i hiat chiat uh ka gingcha ahi.

Ziate haw kal ah chu gingtute haw lengto zel ta ding i hinau ahin, Khrista ah zungkai leh phudetlo ngal chu kinepna ding dang umlo ahi ti thupi i nei hun diak uh ahi tai ti thupipen ah i nei uh a kul ma ma ahi. Jeremiah 17:7-8 na i sim chun, “Lalpa ah kinga mi leh, Lalpa ah kinepna nei mi chuh ana avak ahi. Ama chuh tuiluang kiang

ah thing kiphu, luipam ah zungtha khawlum hung tung leh le laulo, a duate hing zing ngal, khawkhal kum khawk salo, ga lo tik neilo gual hi ahi,” ala ti ahi.

Tuiluang kiang ah thing kiphu leh luipam ah zungthate haw chu, khawlum hun tung leh le laulo, khawkhal kum le khawk salo leh galo tik neilo ati hi a thupi ka sa ma ma ziang ahi. Khua khal leh le, tui umna mun chun, thing leh gua, bu leh balte a hawi ut ah a ga a sua sek uh ahi, tui a nai ah zung a thak thei ziak uh ahi sek ahi, khua khal kum leh tui tawmna mun in, thing leh gua bu leh bal in ga a sua zolo ahi, a ziak chu zungthakna ding tui a tâksap ziak ahi, tui umlona thaichi thing leh gua a hingzo puau ah, ga le a sua zo lo uh ahi.

Tuni hun ah gingtute haw nang leh kei i mamaw pen chu Khrista ah zungkai leh ginna ah phudetlo ngal hi i mamaw umlo ahi Unau. Khrista ah zungkai leh phudette haw chu kuate haw ahi diam? Kipakni,

dani, lawsapni pen ah Pathian tawh kinai taka um thei zingte haw hi ahiu e. Amen, Lalpa chu lopina ka pia ahi. Pathian chate hi chu, bang gual lawm lawm ah vangphat um ahi tam! Pathian kiang ah ka pauchap phat leh, Lalpa la cha hina vangphatna lopi tak ka chan hi kimudaw kileng, zia khawvel ah hin le um nalai dingin le kaki ginchaklo hun bang a um sek ahi, kei bep le hi puang ka nang hawle hi sau sau in lau maw!

Khrista ah zungkai leh phu det hinkhuate chu, bangtik hun ah le Pathian tawh kinai tak ah um zing theite chu ahiu. Jakob zik lam i sim chun, Pathian chu nai leu chin, a manle hun nai ina (Jakob 4:8) ala ti ahi. Pathian in ei panpi ei nai leh i ti chun i nai masak a pawimaw ahi. Pathian nai pawimawna tamtak gen ding chu um intin, Thagau lam ah hausakna leh midangte haw a dinga malzawlna, gitlo haisanna, Pathian a ding leh midangte haw a dinga ginumna,

haksat hun ah le Pathian muan ngamnate haw ahi.

Lal David hinkhua apat in Pathian nai thupina leh khawvel nai a khawk dan a kilang chian ma ma ahi. Pathian ngaina mi ahi ziakin a naupan lai ah belum a chin lai in le sakeibaknei leh savawmte haw le a that sek ahi. Israel lal dinga Samuel in thau a nu ziak kha Pathian nai mi ahi ziak ahi. Pathian tawh kinai zing hileh Bathsheba tawh ala tasuallo ding ahiu.

Pathian lungnatna nasa tak David chung in a tung ahi ti i he, Pathian nai a phat zia hechiantu ahi ziakin, Pathian kiangin gitlo ngaidam a dawn a, ngaidamna a chang hi ti i he, Pathian a kipat gamlat dan chuam chuam um ding ahi. David gual khel i hilo unle Pathian nai thak hitiu. Sam 73:28 na lam kha i sim chun, David in kei a dingin Pathian naih a phai ala tia, Pathian naih a phat dan a hiatchian ziak in, pukna huaisia tak a tuak hun inle Pathian a bel thak ah tun din in a um kit ahi.

Gingtu hinkhua hi lamsuk lamto, khawvel buaina tuipi fawn chung ah um sek maleu hinle, Pathian i nai phawt chun, beidawanna mun pen le kipakna a chang sek ahi. Pathian i nai phawt chun i phaklo ding leh i chanlo ding tiang le ei pesek ahi. Joseph ngei le Pharaoh in ah a gentheina leh zuau thu a heknau zosia kha hung paltou pek in ginum takin Pathian a naih ziak in, zia haksatna a tuak hun kha Pharaoh mang hilchian ding Aigupta gam pumpi hotu lian dinga a kisaklawkna chu hi mai ahi. Alopina lawm lawm e, Lalpa nangma naite haw hi.

Joseph kha Pharaoh hial in le “Pathian Thagau chenna” ati hial ahi. A pa Jacob inkuan zosia leh Aigupta gam pumpi a dingin malzawlna thupi tak tuntu a hung hita ahi.

Gingtute haw i ki etchianna ding ua pawimaw ma ma chu, Khrista ah zung thak lam hi zawlo in, a kekdwak lam bep et in chu bangma chantak

khawvel in ding zolo ding ihi. Khrista ah zung kai leh phudet ah umte haw chu, a thilpha bawlte min hetpilo leh le buai ngailo Pathian tawh kinaih zing chu a kipakna pen ahi sek ahi. Khawvel huipi natna hi

leng zat chuam chuam i het khaklote hawle hung um zel ding ahi, himaleh, damdawi te damdawi, Lal te Lal, hotu te hotu chu ka Lalpa ahi ti'n Khrista ah zung thuk tak tha thei chiat din Lalpa'n ei suhat chiat tauhen.

HAKSAT HUN AH LA DIN ZAW LEH DIN ZAW LO DING LA ZUNGKHAW AH KINGA AHI

Nidang lai pek ah khan gua zuk lo ziakin Tuithaphai pumpi lojau haw chu i vak et leh lungthim nat a um mama a, bu jing dipdep ding hun laiin lolai haw chu a khikek a, kumlui busum haw chu bawng in a nek mai uh a ngai ta, hampa hing mu phak ding um lo ziakin lawi leh bawng te le lungsiat a um hial uh ahi. Etna lam zosia a keu veng vung mai hi. Himaleh Tuitha lui luanna chu a kihe ziang thei a, huisum hing dip dep mu ding a um pek hi.

Bang zia k a diam? Lui pam ah kek a hi zia kun, lui tui chu kang ta maleh anuai lam chu tui um zing a hi zia kin luipang ah thing haw chun a zung uh thuk taka a thaklut uh ahi zia kin achung lam ah a kungpi leh a bakte chawm zo ding khop chu mu zing ahi zia kin thingnate chu le a chawm zo mama a, hing dip dep in a um uh ahi.

Zia guala chun, la kimvel keu sit siat lai ah le hing zinga la um theina ding dan khat a um hi. Khrista ah zung kai la hi chun bangtik ah le kang ngai lo hinna tuinak chu Ama ahi zia kin, thagau ah la kichop hing zingna kham mu zing ding la hi. Ama ah chun tuihing lui putdawk zing ding ahi.

Hui hat zing ziangna mun ah thing kek haw khu la ngaitua ngai em? A neu apat hui in ala mut zing ahi zia kin, zia hui in a sawi lumletna ah puk ziang lona dingin zung thuk takin ala tha ahi. Anuai lam ah a zung thuk taka a khawlut chun a tuk chak a, huipi bang guala hat hung nung maleh a puk lo ahi. A tukchaktu zung a nei zia k ahi.

Zia guala chun, thepna hui in ei mut mut zing maleh, nisin ei la sawi zing lai ah Khrista ah zung thuk taka a la tha a, kituk sakte chu bang gual huipi'n nuai leh le puk mai mai lo ding ahiu.

Malam ah bang la tuak ding la he puai. Himaleh, la tuak tapo maitua ah la din zona dingin la zung thakna enchian in. Khrista ah zung tha ah khangto te chu bang gual hun a ding in le a kisazo ahiu.

BANG HI DINGA HING LA HEM?

~Translated by
Pastor James Th. Minlun

K Ka lekhabu sim khak lak ah hawi ka sak pen leh ka hinna eizo pen chu *Bang Dinga Hing La Hem?* ti lekhabu hi ahi. Lekhabu ziktu minthang tak R. M. Lala in ala zik ahi.

Pathian in mi zosia talent chuam chiat apia, zia talent chu a hawi thei pen leh a phachuam thei pen ah mat ding hi i thil bat ahi. Zia gual ah thil piak chan hethiam ah a hinna ki kaihuai sak mi chu ama a ding bep hilou in, midang ten a mamaw ui ti

hia'n a hiatna leh thiamna mangtu ahi sek ui. Kipumpiakna chamkim chu a lunggil tak ah hiatna tawh sem ahi ziak in a sepna lam lam a lawting tei sek uh ahi.

Zia lekhabu ah hin ama hinna kaihuaitu leh etton tak ah a ngaih mi 26 chanchin a teldawk a, a lengun ngaisan um maleu a bul patna dingin Albert Schweitzer chanchin vak gen hitiu.

Dr. John Belly

pauchapna laa vak gen masa le hin hung kilawm in a, "Aw Lalpa la hepina thutak ziak ah hinkhua nuamtak ka mat thei te hi panpi ngaite hetmilna ah mang lou in, a puakgik teu chu hepina tawh kithuapi thei dingin ei panpi in" ti ahi.

Europe gam ah khawpi lian tak ah Concert Hall ah feet 6 val hial pawsal liantak mai, naupang cha hi maleh samkang bembum mit kua thuk deu mit ngui tak, hepina thuk tak nei melpu in piano a tum git chun a thawng veng vung sek a, a mukmul satak chun a sulangsal diak sek ahi.

Europe gam ah mi changkang mama te music mang ah a suk kipak mamana khut teni thua ah

chun tha khat tha ni nung in Congo luipang Lombardi khua ah hospital sakna ding ah heipi mang ah a thing tukna khut leh Africa gam a damlo te etkawlna ah khutgu dam tak ah atna ding ah mangsek pa chu Albert Schweitzer ahi.

Kum 29 ahi in na sangtak semthei ding in a lawi leh paite'n a nei phak mai mai lo Doctorate degree 3 a nei a; ziate chu Doctor of Philosophy, Doctor of Music leh Doctor of Religion ahi.

Pathianni leh biakin ah piano a tum sek a, ni dang leh seminary ah Pathian thu a hil sek ahi. Schweitzer chu Alsace Lorraine ah nuamtak leh limtak in khawsa sek ahia, ahinla hun chomcha nung in a umna khua (Strasbourg) kimvel ah mi genthei leh haksa tak tak, haksatna tuak te muzing kawm ah ama nuam tak ah a um hi thil hi thei in a heta pua'n ahi.

Kum 1896 in zingkal khat chu nisuak hawitak ka mu in zia gual hinkhua nuam tak ka nei chuam hi

a hina gual gual a mang mai ding ka hi puai. Piak kit ding ka nei ahi ti ngaituana a nei ta ahi. Ka lupna pat ka thaw masang ngei ngei in kum 30 ka hi tiang ah science leh arts lam ah thiamna ka neite hi ka mihing chanpi te dinga kithuapina dinga mat a kûl hi ti thupukna ka siam fel ta ahi ti in a gen ahi.

Lal Jesu'n kuale a hinna humbit nuam chun chân intin; kuale keima ziak ah a hinna chân chun humbit ina ati thu hin a hinkhua a theng danglam ta ahi. Bang lampi haw ding a hem ti vang a he ngal ziang puai. Kuale haksatna tuak a um hi ti a hiat chun ki hiatlou sak mai mai thei a hilou dan a hechian mama hi. Midang in a neilou vangphatna nei chuam hi a pawm theilou ahi. Nisin ah thiltung mihing te chung ah tung te hiatpi in chian tak in a mu ahi. Pathian thil siam zosia kituak tak ah hin ding a ngaitua hi.

Hinna nei zosian a hina dungzui chiatin zaumna a nei ahi ti hi det takin a pawm ahi.

Ni khat chu chanchin bu khat ah advertisment ah Congo ah Mission Hospital ah doctor a mamaw thu kisua chu amu, a mit a la ma ma mai hi.

Mel tamtak ah lian gamsung ah damdawi umlo ahi dan zia mission te hin a sulang ua. Lalpa mit in zia pawimaw dan a mu thu leh a kin lam a dawnhuna pe ding ah dawtna a bawl uh ahi. Zia thusua a mu mu in Albert Schweitzer chun a na chu kuama kiangah gen lou in a sem pan ngal hi. Ka hawl chu ka mu tai ti in a dairy in a ziklut hial ahi. Africa gam ah migentheite chu doctor nasepna ah panpi dingin a kitiam ta ahi.

Zia kipat chun kum 7 sung lekha sim kit a ngai a, hiatlawk lou haksatna leh gentheina a tuak dingte le a helo puai. A thil hawl chu a mu ta, hinla ama dawi dan ah chia ziang thei le a hi diak nai puai. A lawi leh pai pha ma ma leh a innsung mi ama ngaina ma ma ten a thiltup chu a hethiam lou ziak un a hankhum/phun khum sek

uh ahi. Pathian thilpiak loupe tak, a thiamna te hi bangma lou a vui mang mai mai dan in a ngaitua thu a gen ua. Khenkhat in a thiltup hi chapona chi khat in a ngai kit ui. Doctorate degree pathum nei chungah medical course zilna dinga a ki dawtna hi medical college a houtute chun a ngaina a hetlou ziakun Psychiatrist department ah vaki etsak phot ngai hial ding in a gen uh ahi ti thu a gen hi.

Albert Schweitzer in vang thilpha bawl nuamte a dingin kawt lian tak bailam tak ah lut theina hawn ahilou dan a hechian ma ma hi. Medical course kum 7 sung a vazil zaw phatleh a na hawl chu a la piak ding leh piak lou ding he diak lou in advertise suatu mission office ah chun a vachia hi. Amau chun sem dingin a la la ngal uh ahi. A nasepna mun dinga a chia masangin Paris ah admission office ah a chia a. Africa gam mang lak ah a nasepna ding mun a matchak ding damdawi leh damlo etkawna matchak ding um leh umlou

a va en tha'n ahi. Amau chun maksak mel deu in, "damdawi maw?" ti in a la dong uh ahi. Damdawi leh damlou te ki etkawl na ding matchak ding zosia aman a ki ngaitua ding ahi dan a la hil uh ahi.

Schweitzer chun a law ngaina a hiatlou ziakin sum lawna dingin concert ma ma a bawl kit ta ahi. Damdawi leh damlou te etkawl na dingah matchak poimaw diakte a chawk daw phat in Africa gam chu a zuan tai.

A sepna hospital neucha chu Congo lui naak lam 500 Km vel a gamla apat in damdawi inn dang a umlo ziakin long a chuang in a hun zuan veng veng sek ui. Congo lui tui tawm deu na mun ah Ole (crocodile) mi nek ding hawl a kam ka hawm sa vak vel mu ding le tamtak a um sek hi. Schweitzer in sai in a ha ah a puaitel leh zonglian (Gorilla) in a ban a pe liam te hukdawna dingah a nasep thute a gen hi.

Schweitzer chu milian tak ahi gual ngei in thanei

tak ahi. Damlo etkawl na bep ah a hun mang lo in ama khut ngei in hospital suk pitinna dingin na dang dang le a sem sek hi.

Europe gam a pat ama hun kithua pite kiang ah ding lekhat hot ngai nuam um tak tak te a thot sek hi. Kisuk halna ding a neisun chu music lam ah a sep phatchuam dan hetpina ziak ah Bach Society in piano a piak kha ahimai hi.

Africa ah gam a satna mun pen gammang nuai ah chun music leh damdawi a kawptua zing sek hi. America lekhazik minthang ma ma khat Norman Cousins hi Lambarene Hospital a mit ah va mu te lak ah khat ahi. Ni khat chu a sat vanglai tak in hui thiang dong ding in zan ah pawlam ah a vak vâk daw leh, gam gamla tak ah music git a vak he. Hun chomkhat nung in a thip kit ngal tai. Cousin chun bang thu ahi dia aw ti in Albert Schweitzer inn lam chun a va chia hi. Kotkhak apat a vak etleh nitum ah nasep ziak ah gim talua a chal pang a khut ah sawn

kawm ah piano chungah kingam ah um chu a va mui. Norman Cousins chun 1990 kum in Albert Schweitzer prize ala dawng hi.

Albert Schweitzer hin kum ni dan in hospital ah sum leh pai poimawna ziak ah sep khom pi ding hawl in Europe gam in a chia zing sek hi. Hospital ah nasemte ngaitua ma ma sek maleh a lo theilo ahi ziak in haksa satak chung in a chia san ham ham sek hi. Zia zosia ban inle lekhabu tamtak zikna ding hun a pe zou nalai hi.

A lekhabu zik langsar deu te chu:

Memories of Childhood and Youth

African Notebooks

Out of My Life and Thoughts

Mysticism of Paul the Apostle

The Quest of the Historical Jesus

The Decay and the Restoration of Civilization

Civilization and Ethics

On the Edge of the Primeval Forest

Khawvel in a nasep lopi tak chu a hun hetpi tau a, Africa gammang sa tak nuai a kum 40 na a sep hetpina leh chawihawina'n Albert Schweitzer in nobel prize for peace amu thu chun Africa ah a umna mun thip tak chu a tung ta ahi.

I gen sa gual un zia gual mite hi Pathian kona hechian ah kipum piakna tak tak tawh bangkim tuak dinga kisa zosa; Pathian na sem dinga kuan dok te ahiu. Zia gual mite hi a lawting ngei ngei sek ua, a za um ma ma ui. Ei hawn vang tha law muna ding dawina ziak bep hileh kilawm in advertisement te i thiamna degree nei zosia tawh government nasepna hawl gual ah exam pesekte tawh vang a kibang lou uh ahi. Zia thil poimaw tak ah hin ki enchian in kochuam puitute'n le Pathian nasem ding i lak te hi bang ziak ah sem nuam a hui em ti hechian masau henla, chutileh Albert Schweitzer gual mi a mu tei ding uh ginchak a um a, Pathian nasepna le lawkpi ngei ding ihui.

THÂWI LEH GINGTUTE

Bible Text: Lev.23:6.

~Pro-Pastor T.L.Mang Vaiphei

T **Thumasa:** Thuthung Lui gun tak ah suite â dingin a dikna bukim hung kilatna chu Thuthung Thak a hin mu thei a hi. Thuthung Lui hi gun tak a sui mute â dingin Thuthung Thak hi bailam tak ah hiatchian thei a hi. Thuthung Lui hi Thuthung Thak â dinga chun a lîm gual a hi. Tuni hun a hin, bible ah *Thâwi* hi bang etsakna a mat uh a hem? tileh, tuni hun ah gingtute â dinga bang phatchuamna a nei em? ti hi tamlo vak en khawm hitiu.

Thâwi umzia: I bible ah *Thâwi* kiti hin *gitlona* ahiloleh, *sualna* etsakna hi (1 Kor.5:7,8). Israel chate'n Chiakân Kût ah kithawina thillat a bawl uh khan Jesu Khrista a etsak a hi. Ziaziakachun, Pathian in Israel chate kha *thâwi* panglo vâithum kût mang dingin a la hil a hi. Israel chate'n chiakân kût kithawina thillat latzaw ah *thâwi* panglo vâithum a nêk ding ua thupiak a hi khel khelna ziak kha nek, *Jesu Khrista*

gitlona ngaidamna dinga latdaw a hi nung ah Khrista thisan ah silthianna hinkhua a etsak a hi. *Thâwi* tawh kihel vâithum chu *gitlona hinkhua* genna a hia, *thâwi* panglo vâithum chu *gitlo ngaidam* ah um ta hinkhua genna a hung hi tai. Thuthung Lui hun in Pathian in etsakna ngâwn in a bawl a, a guitunna chu Thuthung Thak in mu in a um tai. Thuthung Thak ah *thâwi* panglo vâithum vân a kipat

hung suk a ti kha Jesu Khrista taksa khawvel ah i gitlo ngaidamna ding ua hung kipia genna a hi (Jn.6:33). Zia vâithum chu Judah te'n a nek ding phat ua leh a bal kek sek ua, zia umjia chu, Jesu taksa suksiat a um etsakna a hi (Is. 53). Chiakân kût in Jesu thina, vui ah a umna leh a thawkitna a etsak gual in, Thâwi panglo vâithum kût hin gitlo ngaidam ah um ta hinkhua a etsak a hi. Ziaziakachun, thâwi panglo (Gitlona panglo) vâithum kût chu a mang sek uh a hi.

Bang ziak ah i bible ah thâwi kigen zing a hem?

Thâwi hi gitlona hinkhua etsakna a hi ziak in gen khâk in a um veu sek a hi. Zu lak in thâwi kihel lo taleh, khamthei hi pua'n tin, kuama'n dawn nuam lo ding a hi. Ahi'nlah zu ding ah an a huan

phât ua leh a lak in thâwi a hel sek uh a hi. Zia thâwi chu zu dinga kihuan lak ah hel a hi phât leh bu a huanna tui uh kha zu a hung hi thei bep a hi. Thâwi chun bu tui hilâi zu a chansak gual in, thâwi chun mihing hinkhua gitlona a hinsak a hi.

Thâwi leh tulai mihing hinkhua:

Mihing hinkhua hi pianken ah gilo sa him ah piang i hiu a, zia umzia chu thâwi tawh helsa piang i hiu tina a hi. Himaleh, mihing hinna thâwi chu sâwpthian a hi theina ding in Jesu Khrista'n khraws in a hun thuak zo ta, ama'n i gitlo man uh a pe zo tai. Khrista hukdam chate chu thâwi panglo hinkhua thiangtho tak nei ding ah tatdawte himaleu hin, thiangtho dinga silthian i hinau kihiatlosak in, thâwi tawh hel hinkhua ma

i lunggul pen uh a hi. Thâwi tawh hel lo hinkhua la neina dinga la thâwi tawh kihel gitlona sâwpthianna dinga a hinna hun petu Jesu kha ngaitua thak in.

Thâwi ziak in:

- Khrista'n khraws chung in la thâwi sâwpthianna dingin a hinna a pe ta. Bang ziak ah la hinkhua thâwi kha itcha tak ah kawl zing la hem? Thâwi vawp zing ngâlin silthian ka hi tai ti thei ding la hem?
- Thâwi hina dik tak la hiatchian chun, thâwi kihel hinkhua chu kidak ngei ding la hi. Thâwi umzia dik tak la hiatchian nawp lo ziak in, la hinkhua thâwi um kha paitha ngam lo la hi.
- Lalpa'n gitlona sal ah i tannau a kipat in

ama taksa ngei hung kipia'n i zalenna ding un mualphona tincheng thuak in Khraws chung in a hung thuak a, a hung thi ta, vui ah um in, thina zo in a thokit tai. Himaleh, Khristian tam tak gitlona sal ah kipat zalên nuam lo gual in gitlona kawlbud in saltâng hinkhua i mang zing nalâi ui.

- Pathian hepina hi phatchuampi lo a chang i hilona ding un, Lalpa'n ei guat piak vâithum thiangtho Jesu thisan in kisil thiang hitiu.

Thutawpna: Tuni hun ah gingtute hin i vangphatnau ngaitua thak kit in, Lalpa'n i zui ding ua ei guat piak lampi chu haw in, a thu jâwm in, ama pawmtâk hi ding in kilân thak hitiu.

LA CHAWTNA TAPHOT CHU LA GAM HIPEK INA

-Pastor James Th. Minlun

Chutia a kaidaw zaw phat ua chun, La hinna humbitna ding in taidawk unla, la nunglam en lo hial in, phaijang ah hin le chawl him him lo ding uh ahi; tang lam ah khin taidok un; chutilochun mangthai kha'n lau atiu a.

(Gen 19 ;17).

A Amasan *Muanna aksi* ala sim zosia a hung paita ding i lalpa Jesu min in 2021 Kumthak Chibai!

Lalpan Joshua kiangin La chawtna taphot la gam hipek ina ati hi gal do ding bang macha umtalo ahi a tina ahi pua; a do ding melma tampi um ahi dan a gen piak a, himaleh ka thupiak la zawp chun zo pek inla tin, la chawtna taphot la gam hi pek ding ahi ati zaw ahi.

Nang leh kei le i chawtna taphot i gam ahi theina ding in Pathian thupiakte zawm ah hinna i nei angai ahi. Hinna neilo chun chawtna gam a nei theilo ahi. Ziaziakchun hinna i nei theina dinga hinna humbitna dinga jamdaw ding hi mi zosia alian aneu aching athiam

ahau avai kidang lo ah i pawimaw chiat chu ahi. Hangsan tak ah ding ding ah kitilna ding tampi um maleh dawilawk takah jamna ding gen hi poimaw zaw in ka hiai. Aziak chu setan nasepna ado ah do thaw ding tampi aum lai in do khel lo ah azam ah zam mangsan ding le tampi um ahi. *Mi pilvang chun thil phalo hungtung ding ala mulawk in ala zamdaw sek ah, mimawl in vang akhawni ngai loziak in athawk khawlaw sek hi.* (Pro 22:3) Suang a hung kilik hi ti henasa zam daw lo ah thuak hat tak ah do ding ah kisinsak sang in ala zam mang ah

thuak khel lo ah ki vendaw chu hinna zawk ahi. Zam mangsan lo khawk dan leh zam mangsan poimaw dan vak en hitiu.

Christian te Lalpa'n i chawtna taphawt i gam dinga eipiak lai ah bang ziak ah i lak theilo uh ahi diam. Bang ziaka revival, crusade ki mamaw zing a diam ? A dawnna chu setan nasepna i dozo lo ziak ahi. Setan nasepna i dola ziak hi bangziak? I pilvang lo ziak ah zamsan ding i zamsan ngamlo/nuamlo ziak ahi. Haksatna i tuak tamtak hi i khawni ngailo ziak ah zam ding hun ah i zamsan lo ziak ah i ngakdaw ham ham ziak ah i thawk tam pi a um ding ginchat a um hi. Thil phalo tung ding he a, ala taimangsan ziak ah a chawtna chan Lalpan a gam dinga ala piak mi pilvang Joseph chanchin apat leh thil phalo hungtung ding he ngal taisan nuamlo a gam dinga piak gamsung le lua zolo mi khawni ngailo Samson chanchin apat in

i Christian hinkhuau vak ki enthak hitiu.

Joseph: (A chawtna taphawt a gam dinga Lalpa'n a piak)

Joseph chanchin hi gen tam ngailo ah i hiatsa vek ahi. Insung ah a umlai in apa dawisakna changin apan puanakchual a khuipiak ahi. Potiphar te insung ah a um in insung ah ah thil um zosia ama khut ah kawi ahi kit hi. Suangkul sung ah a um in suangkul sung ah um zosia ama khut ah kawi ahi kit ah. Aigupta gam a hung tun un Aigupta nei lah lam zosia chung ah thu nei in guat ahi kit hi. A chawtna taphawt a gam ahi theina hi a ziak um ahi. Pathian thupiak zawm ah thil phalo a zamsan ziak ahi. Mi mel hawitak ahi ziaakin apinu Potiphar jinu'n ala enla mama ah, eilup pi in ti in vel tam tak ala zawl ah himaleh pilvang tak in ala nial tha sek hi (Genesis 39:10). Api nu chun a thu mai in kizo lo ding ahi ti ahiaht

phat in apum mat thaw mai a, Joseph le a zam daw k a, a puan a taisan mai ahi(Gen.39:11-13). Joseph hin hepi zia hi thil diklo ahi ti in thuak hat tak in zamdaw k lo in um zing leh thusim chuam a pawt ding ginchat a um hi. Mihing utna nei thei dinga Pathian in a siam ahi aki hia kisumzolo thei ahi a ki hiat zia k ah a zamsan mai ahi. Adiklo henasan thaw k hatding ahi ti in umzing leh a kipuk tho tho ding ginchat a um hi. Joseph a dinga a bitna chu thil phalo ahi a thu bep hilo in a zam ah zamsan hi ahi. Potiphar zinu mel hoitak leh etla umtak aman a vazawl le hilo min anai ah hun nailut thaw ala taisan ham ham pa chu achawtna ta phawt Lalpa'n agam ding in apia ahi.

Joseph achawtna taphot agam ahi theina ding ah a kisum zawna leh a taisante:-

(a) Lungnat thangtawmna ataisan ahi. A u ten thagum

chang ah kokhuk sung ah a selut lai un leh Median te khut ah a zaw k daw lai ua hin mihing hina ah chun lungnat thangtawm theina ahi. Thi thotho ding ka hi leh mi khat bek ka tha ding ahi ti ngaitua thei ahi. Ahiloleh, lungnat zia k ah ama hinkhua ziang le kisusia thei ding in ginchat a um hi. Chuleh a unaute ama kiang ah nekding hawl ah a hung lai un lungnat thangtawm taisan lo hileh phuba lak theina ding hun lem chang ahi. Achawtna taphot a gam a hi ziangna zia k hi lungnat thangtawm ataisan zia k ahi.

(b) Ataksa utna ataisan ahi. (2.Timothi 2:22) Potiphar jinun avel avel ah luppi ding ah azawl lai leh thagum ah amat ziang lai hin a taksa utna neilo ahi puai; a utna a taisan ahi jawi. Joseph hi achawtna taphot Lalpan a gam dinga apiak theina zia k leh testimony pha tak a nei theina zia k hi a thuak hat zia k bep hilo in a taisan zia k ahi.

(c) *Pathian mitmei aveng ahi*. Ka Pathian mitmu leh ka pu dona zia gual thil hi ken bangtin bawl thei ding kahem?

Gingtute i chawtna taphot i gam ahi theilona ziaakte enthak kit lehin lungnat thangtawmna taisan nuamlo, ngaidam theilo, phuba lak nuam, taksa utnate taisan nuamlo, Pathian mitmei i venlo ziak ahi. Thusim hawitak ngainuam umtak leh mi a dinga etton tak thei ding hi ngal, gitlona a taisan nuamlo ziak ah chanchin gen ding bei hial ah um khak ding alau um mama ahi. Gending umlo chu pha nalai chanchin hoitak gen ding neilai, aphalo ah kichai ding i hi khak ding a lau um mama ahi. Thepna hi ado ah I do thaw guat chun do zolo in puksia ding mawng ihi. Ziaziakchun siatna hungtung ding te he in pilvang tak ah i zamsan ding hi akul in apoimaw ahi. (suang hung kilik hin ei sepkha ngei ding ahi ti he ngala tai dawknachang helo chu athuak ding

maawng ahi). Thawkhatna hi taksa leh thagau ah lawtinna dinga a poimaw mama ahi lai lai in, thuak khel lo ah i zamsan mai ding tapi le um ding ahi.

Samson: (*A amite hukdawkdinga Pathian in a guat hi maleh ama hukdaw ngai ah um*). Pathian in a mite hukdawkdinga special ah mi dang tawh kibanglo ah hatna chuam ala piak ahi. Himaleh a pilvang zaw lo ziak leh thil phalo lak apat a zam mang nuamlo ziaakin mi huk dawkdinga siam ah umpa chu, mi hukdaw ngai in a um ahi. Chanchin pha henailo te kiang ah hukdawkna nasep chanchinpha tangkopi dinga Pathian in i liangko ah a ngak lai ah nang leh kei hukdaw ngai ah i (Revival leh crusade) ngai ah um zing hi kingaitua hun ahi,

Samson in world record asiamte vak en hitiu:

1. Sakei baknei puaitel (Vaihawmte 14:6. A tha mai mai ahipua, paper

gual ah a puaitel mai ahi.

2. Si-al zathum a hing ah mankhawm (15:4.) Thang ahem meithal ahem ah a damsung a mat kiti a hi puai, khat vei thu ah si-al hingsan zathum zen amat khawm ahi.

3. Gaza kul kotkhak khuampi pumang a, Hebron tangvum ah vakoi. (16:3.) In khuam pani hile bawn thupi kisa ding ah khawpi kul kot khuampi chu a puakmang ahi.

4. Sabiltung khagu ah mi sangkhat khenlum. (chem ah satlup ding hung kitiang hileu le sangkhat sat lup chu bai lam lohial ding ahia, aman agalte ama that ding ah hung kuante zia gual ah hi abawl mai ahi)

5. Kulpi khuam sawnbang (Judge 16:29).

Zia gual thil hi theina a nei hi Pathian khut a chung ah aum ziak bep ahi. "Thagum hatna ziak hilo thil hi theina ziak le hidiaklo in thagau ziak

bep in ahi ti'n sepai honte Lalpan ati". (Jakariah 4:6).

World Record siam lak in Samson world record siam hi huphul um pen dingin ka ngaitua hi. Ama thilbawlte hi tuni tiangin kuama a bawl dawk be a kihe puai; a bawl gua le kihe nailo ahi. Bawl be kit dingin kuama'n le a ngaitua puan tin bawlbe chi le hilo ahi. I ngaitua leh thusim mai mai hina, atak tak a hina diam ti hi ginla um vang vang khawp ah lopi ahi. Pathian a dingin thil hi theilo a um puai. Ahitheilo hi thei sak pan bawl thei ding ati ziak ah zia te hi a bawl mai ahi. Zia gual ah thil lopi bawl thei mihat khawkheng hukdaw ngai ah a um mai hi da aum e ti khel gending umlo ahi. Samson gual ah thagau lam ah hat khawkheng ah i ngai, testimony hawi tak nei Pathian umpina leh mapuina thupi taktak gending nei ngal hukdaw ngai ah um tampi i um ding ginchat aum hi. Bang ziak ah hukdaw ngai ah um ahi em ti hi vak en hitiu:-

(a) *Thumanglo*. Ahingtu anu apa thu manglo ah ama thutak ah Delilah aki chenpi guat ham ham ziak ahi. Gingtu tam tak hi Samson gual ah pha kisa a, mithu la nuamlo ama thu bep thu sa, he leh pil kisa kuama thu mang nuamlo, thagau lam ah a pianna a nule pa zalo, insung khawsung leh kochuam sung kuama thu mang nuamlo a mathu bep thusa; zia te hin mi a subuai sek ua mi a sukbuai bep hilo in ama leh amau kisusiau a, mi a dinga mat theilo bep hilo in ama leh amau le aki doilo in a hinna natiang it umlo takin a mang sek uh ahi. Anu apa thu manglo ah nungak khat buaipi ah kingolsak pa chu a damsung in zineilo in aumta ahi. ziagual thusim gen ding nang le nei inla.

(b) *Pilvanglo*. Gingtu te hi Gul gual ah pilvang ding leh vakhu gual ah nunnem ding ihi lai a, pilvang zolo leh nunnem zo lo in i um sek ahi. Samson hi khatvei a sukkhialna ah a thipi ahi

pua, thepna vel tampi a tuak nung ah le a zamsan nuamlo ziak ahi. Delilah in tha ding ei guat ahi ti hena sasa, avel avel ah akithep sak ah a thuguk a gendawk gual in gingtu nang leh kei le vel bangzat iki pukna ma ma thepna ituak ngai ngai ah kipuk ihi diam ti vak ngaitua tia? Setan hin la hatlona ahia; zia la hatlona ngei chu mang in mi athem sek a, zia la hatlona ma mama chu mangin avel avel in la kipukta hilo amaw?

I chawtna taphot i gam hi ding in Lalpan ei pia, khawvel gam zosia ah chiau in ka thu hiatpi ding leh namtin a mi nungzui ah siam ding tin ei guat a, zia bep chu hilo khawvel tawpni tiang ah umpi ei tiam lai ah Samson gual ah kisum zaw lo ziak leh taisan ding taisan nuamlo ziak ah i chawtna taphot i sudong ziang hilo in, Joseph gual in taisan ding taisan ngam thuak hat tak ah chanchin hawitak nei thei ding in Lalpan simtu zosia malzawl ta hen. Amen.

MISSIONARY TE'N ASAWLTUTE A HIL LO UH HAKSATNATE

Missionary khat i sawldaw a, thasin ah a law ding i piak thei ua leh pha ziang a ngai tam tak i um thei a. Thil pakhat i ngaitua dinguh a um hi. I sawldaw missionary te hin a sawltute kianga a gen lo uh haksatna tam tak nei ahiu ti hi tuni hin vak ngaitua thak hitiu. Thil zosia i hiatpi lo leh le zia cheng bek hih hiatpi leuhin pha mama ina.

1. A va lutnau gam ah mite'n mi chuam ah a la mu uh, ginmawna leh musitna ban ah huatna leh ginlelna tam tak tawh ala en ahiu. Zia dinmun ah hin haksatna gen gen thei hilo haksatna tam tak tuak ahiu. Atun til lai uh chu pauchapna tam jaw diak a ngaih lai uh ahi.

2. Lungleng taka kalsuan daw k ahiu. Eih chawlkal khat vel ding bep khualzin sek te'n bawn khualzin zongsak lo ihu. Mi gam ah va tham veng veng dinga chia a hiu a, thawmhau taka kipan

daw k ahiu. Lalpen Sepai Hangsante chanchin haw apat in missionary te lunglenna leh insung mite tawh kikhen a haksat dan la la sim daw ngei ka gingchai. Missionary masate chanchin apatin a kichian thei mama hi.

3. Mi gam ah umte'n, inlam apat kanthakna a umlo tak leh hiatmil ah um ka hi ta dia aw tia kingaisiatna um thei mama ahi. Lekhathot bep ah kihattua lai vang ah khan missionary te lekhatthot ah tilkhau jel a poimaw dan ila hiatsau ahia. Tuhin

chu lekhat hot khel khel lo ah le nisin vak ho theina *cell phone* i khut ua um ahi ta. La ho lo leh le *sms* bek *WhatsApp* bek ah ho thei ahi tai.

4. Missionary te chate cha hih ngaitua tia. Amau khuahiat masang ah a nu leh pate'n Pathian kona ala dawnhunau ziaka amau dawitelna hi lo hiala mission field va tung ahiu. School a va kai ua leh mel chuam, pau chuam hina ah amau kham taka musitna leh engbawlna le va tuak thei ahiu. Nam chuam hina ah bawl chuamna le a va thok uh ngai ahi. I pauchap piak phat leh a chateu le hiatzing ding ahi.

5. Kuama kianga a gen mai mai lo uh sum leh pai ah taksap hun tam tak nei ahiu. Ei lam chu u leh nau kiang, gual leh pai kiang ah

vak bat vak thei ahi. Dawr ah le melhiat i nei dungzui ah bat bat thei ahi. Missionary te zia gual chu hilo ahiu. Pathian nasem hi ngala a taksap mama niteu tam ding ahi. Ziaziakchun ngainatna leh dawisakna sum leh pai thot thei bang la nei leh dawn jangkhai chuam mama inla.

6. Inlam a hung pawt tak ua leh kilawp mama sek maleu sum leh pai haksatna ma hih a buainau ahi sek hi. Ziaziakchun mi mal hi leh kochuam hileh, lemchang imu dungzui un kithuapina bawl thei kham kham bawl zing dingin kihil hitiu. Kochuam khenkhat in chu missionary hung khualzinte sawmdawl dan i he pan tau a, kipak a um hi. Haksatna ki hiatpiak kiti hih kitilkhauna thupi tak ahi ti hemil puai tiu. Sum leh pai bep hilo in,

sil leh chen amau leh a chateu a dinga piak thei i nei leh pha mama ina (alui i dawih taklo te hilo in, i dawh lai, a pha piak ding ahi, Lal Jesu i tuamnau in ngai leuhin maw).

7. Anne dinga khatvei ila ko thei leh kitilkhauna pha tak ahi. Amau pauchap sak sangin le eima'n pauchap piak lehin apha jaw diak hi. Amau in pauchap nopna chuam a nei uh le thu chuam. Achung ua thilpha bawl thei thei bawl hitiu. Annek bep hilo a, piak thei i nei leh pha jaw sem ahi.

8. Lekhabu pha, a matchak diu note book, pen hoi deu khat ti bang, thil dang dang la dawisak khat pia lechin sawt tak phatchuampi ding ahiu. *Muanna Aksi* kum nga a ding a lakman piak piak ti bang, a chateu kum khat lekhabu mun

ding ti bang, khatvei admission fee tuak piak ding ti bang hih mi bawldan ka la mu sek thil pha bawl na thupi tak ahi.

9. Inlam ah a hung pawtdawu kilekit tak leh lam kal ah khatvei annек man ding, thingpi dawnna ding ti bang piak a pha mama hi. I khawtuana suklatna hawi tak ahi ziakin kipakna mai hilo a thamuanna lian tak hi ding ahi. Mi'n ei ngaisak in, ei khawtua hi ti hiat hih thamuan um ahi.

10. A field uh a tun hun uh hih tilkhau a ngaih lai tak uh, pauchappi a ngaih lai tak uh ahi. Lungthuaina ding ala um sek ahi. A umna ngaih ngaih uh hi maleh inlam pawt kal ah thil a la kitheng danglam, lungthim natna ding, lungkiakna ding, lungkhamna ding ala um thei sek ahi.

11. Missionary chiat chiat lawtin dan kibang lo ahi ziakin a sep nau ah gasua dan ah telo ding ahi. Field haksa a um a, a bailam deu a um hi. Eihuh thingtangmite'n hun sawt ngai lo hiala Pathian hing i hung gin uh hih missionaryte kha mi dang sang ah a kipiak zaw ziak uh ahem, a sep hat ziak uh ahem hi diak lo ahi. Thailand gam khu mission field haksa lawi ah a gen uh, missionary khang ni khang thum lawsam ah kilekitna gam ahi. A lawtinnau hilo in a ginumnau Lalpa'n a en zaw ahi.

12. Missionaryte hin pauchappiaktu tam leh tawm a nasep nau ah hiat theina a nei ui. I missionary masau Evan. Lam Cin Thang kha JPT in pauchapna ah i hiat zing ziak ua a sepna gam ah Pathian nasep thupi a tun ziaka, zia guala gasuana dinga

pauchapna ngaina ah i pauchapnau hung don ah hung veng veng Evan. Gin Khan Khual kha upa lamte'n chu he nalai inau. Missionary i sawldaw teu hih a meichang hi taleu pauchaptute hih a thauvui ihu ti hemil puai tiu.

Tuni ah missionary te dinmun leh haksatnate hih la sim lai in pauchap tamjaw dinga la ki ngaitua ginchak a um a. A chung ua thilpha bawl ding le la hiatdaw ngei ding ginchak a um hi. Zia ziak chun la mu lo lai in pauchappiak inla, la mu hun ah thilpha khat bek a chungua bawl ding in kingaitua in.

(Zia hih la sim khaksa ahi. thil pha le ki hemil pai sek ahi ziakin sim kit dinga hung kisua ahi. I pauchapna dinguh leh thil pha bawl thei thei i bawl na dingun).

I CHUNG UA BEK ZING GITLONATE PAITHAKNA

-Rev. Dr. Kh. Khaizakhm

Kum thak, 2021 i hung galkaih ua hin, kum lui zan ah thupha chawina pha tak hung nei zo a, kum thak nung ah le tha khat hung mang zo kit ta i hinau ah, maban kalsuan jelna dinga, chingthei taka chia jelna dinga poimaw la ngaitua zawm ding kinep a um hi. Gingu hinkhua ah poimaw mama khat chu eima ah bek zing gitlonate paithak zing hih ahia. Zia thu hih athak in vak ngaitua thak kit hitiu.

Kum thak, 2021 i hung galkaih ua hin, kum lui zan ah thupha chawina pha tak hung nei zo a, kum thak nung ah le tha khat hung mang zo kit ta i hinau ah, maban kalsuan jelna dinga, chingthei taka chia jelna dinga poimaw la ngaitua zawm ding kinep a um hi. Gingu hinkhua ah poimaw mama khat chu eima ah bek zing gitlonate paithak zing hih ahia. Zia thu hih athak in vak ngaitua thak kit hitiu.

Gingu hinkhua hih apha bawl ding tam tak i kihil laiin aphalo paithak ding le um zing ahia, zia chu i ngaisak lo chun i kiginchak sangin masawn

lo hial ding ihu. Kum bul til ah hin zia thu hih vak ngaitua thak kit hitiu.

Gingtute chu kitaitetna mualsua dinga kineppi ihu a. Zia dinga poimaw mama chu i chung ua bek zing gitlonate paithak ding ti hih ahi. Hebrai mi Khristiante hih a lekhatthot chia dan i et leh achang leh suanum tak ding a bang ua, achang leh zilgaih zing ngai a bang kit ua. Abang hileh, amau kianga kizik thute hih ngaikhawk ding leh eima kalsuanna kivelthakna ah mat zing dingin a poimaw ahi. Zil gun ngai mama lekhatthot ahi.

Tulai gingtute ei sunawkphak gitlonate

hih bang bang ahi diam ti ki dong leuhin eimau tuak khak dungzui in a dawnhuna chu pia ngei hitiu. Ahinla, a gen nuamlo le ki tam dingin ginchak a um hi. Khenkhat a dinga chun a huaisia deu deu-tisa nopna lam ah kisum zawlona, mit leh lungthim ah angkawmna, mi zi awchakna, thangsiatna ti haw, melsia tak tak haw hih hi ding ahi.

Naaman guala phakgukna nei

Kuama hiatlo ah a guk ah phakna – Naaman guala phakgukna nei le ki um thei mama ahi. Naaman kha chu taksa ah phakna ahia, vangsiat ziaka a chung ah ala um ahi. Ahin, a buaina kha vak hiatpi vak leuhin. Mi lak ah sepai hotu lian leh galhat hina ah lengpa'n a jemhoina kithuamna van tawh mipi lak ah a um phat leh etnop nop um hialin thupi mama ding ahi. Himaleh, inlam a tun tak leh kuama hiatpi lo ah lungngaina, ama leh a zi bep in a hiat uh chu a phakna

kha ahi. A kithuamna vante khan ala khu zo sek maleh inmun ah chun kisutthak sek ngal jel ding ahi. A kisut thak tak leh ama leh azi lungngaina pen chu a phakna kha ahi.

Thagau lam ah phakgukna nei tamna mun ah chun kochuam lim leh halh a um thei puai. A ziak chun biakin kai ah hung khawmte lak ah mi tam tak chu a guk ah gal lel tak tak, phakgukna in a suk jawnkhal ahi ziakun ahi. Tulai phakgukna chu zia haw hi le a hi mai hi: Jawlsaina, jawntat lungthim leh jawl mit tet pum ah hinkhua mang, a lemchang leh tisa nopna sal ah kipelut ziang thei haw hi kipak tak tak puanau.

Mi tam tak buaina chu tulai khantona a sia lam ah matna hih ahi. I *smartphone* teu hih apha lam ah mang te a dinga a phatchuam majen tawh. Aphalo lam ah mang a tam mama a. Milim thanguai leh numei pawsal pawlche taka kipawl na haw mu thei a hi mai ta. Zia ah kipelut ngal te chu

khamthei dang zongsak (addict) gual ma ahi mai ta. A lungthim uh leh a hun uh a la zo sek ahi. Kisuangla kawm kawm, a diklo ahi ti le he kawm kawm ah bawl mi a tam mama ahi.

Zia lampang ala sut ngun deu pastor khat ka vak dot leh ama'n ei hung hil i chung ua bek zing ei sunawpphak haw leh ei suhat lo te chu *cell phone* etna ah hun tam mang talua, mi tawh thu manlo leh mi gensiatna thu genna ah hung mang tam, thingpi hotel ah chu mun leh chu sawt thei talua, thatdana ah hun subei ti haw hih ahi. Kochuam ah semtute leh lawiupate ahiu leh seppite demna ah pau pau zing, mimal Pathian tawh kipawl na ngaisak lo ah holimna phachuamlo ah pang tam talua, a lim thaw mai mai a lungawi ta, officer leh sum nei deute maipha hawl a pauchap ah kuan kuan, insung ah lungchom leh phunchiak haisan lo, mite pakchatna hawl talua ti haw hih a hung gen a, a dik kim vek mai hilo ahem?

Abang hileh, a phalo lam

gen gen hih a phatchuamna a um pua, a phatna ding lam jawk gen tam jawi tiu.

Pianthak nung, sawt tak tak thagau ah kipak taka a la um ta le hi mai thei, tuhun ah gallel taka hinkhua mang la hi chun zia a nuai ah te hih ngaitua thak a ngai hi.

La chung ah bek zing gitlona, paithak dinga hil ah la umna hih zui lechin a kipak pen ding chu nangma ngei la hi. Zia la chung ah gitlona bek zing chu thasuak thei lechin thawveng mama inla. La zaw theina dingin zia a nuai ah te hih ngaitua in:

1. Bang guala haksa hi maleh gitlona bek zingte paithak thei lo ding a um puai. Paithak theilo ding hi leh lekhat hot ziktu'n, "Pai thai tiu" ti lo ding ahi. I malam ah kitaisiakna lampi hih i tai mualsua theina dingun paithak ngei ngei ding ahi. I paithak lo chun a paitha theilo hilo a, paitha nuamlo hi ding ihia, thumang lo hi ding ihi.

2. Ka la ziksa gualin, kisak thei deu ding ahi.

Kisaktheina pha um ahi. “Zia gual bawl ding hin ka kilawm nalai ah ahem” ti haw hih kisaktheina pha ahi. Nehemiah in, “Kei tawbang hih jam mai mai ding ka hem?” ati kha le kisakna pha ahi. La phuaktu’n, “Ka pianna Lal thisan ahi, gitlo nasep di’n ka kiphall diam?” ati kha le kisaktheina pha ahi.

3. Sual do zo zing a um hih Lalpa thiltup sukbukimna ahi. “Kei chu hinna a neina ding ua hung ka hi, tam taka a neina dingun” (Johan 10:10) ala ti kha, piangthak ah lungawi mai ding hilo a, hin tam tak nei ding tup ding ahi. Thisan ah ei tantu kipakna chu Ama mel pua ah khan zingna hih ahi.

4. Kitaisiakna ah i taina i ngaikhawk ahi chun ei sunawkphak zosia i paitha ding ahi. Gitlo guk bawl zing thei ihi chun i taina ngaikhawk lo tina ahia, Lalpa lungdamna hilo ding ahi. Khawvel kitaisiakna ah taite khu en lechin a jangkhai thei pen ah kivan ahiu. Tawka chual cheng pum ah tai mu kha pua’na.

Puanak bansau ak a tai le mu ngai pua’n la.

5. I taina i ngaikhawk chun Lalpa lam enzing tina hi ding ahi. Nunglam ah Lalpa a chia puai, i malam ah chia a hi ziakin malam i enzing ding ahi. Malam en zing chun gitlona bawl bawl thei lo ding ahi.

6. Ginum tak leh thuakhat taka i tai ahi leh mi thiangtho ala chia masate ei la thil zingnau i hezing hi tina ahi. “Hiatpitu sumpi nasa taka um kimvel” (Heb. 12:1) ti hih gingtu galzo chia masate, tunkim hun ding ngakla taka um eila thil zing haw genna ahi. Galzosate etthak ah um zing ihi dan kihia zing leu hin kithada ngam ding hilo ahi.

7. Gitlona do ah thisan pawt khop ah pan a ngai leh le pang dinga ei kineppi ahi (Heb. 12:4). Tulai gingtu sukgentheina tuakte i et leh thisan pawt hiala pang ngawn ahiu hilah. Communist nuai ah, Muslim te nuai ah, tuhin Hindu kulmutte khut ah thokna aban ban ah hung um ding ahi. Zia gual ah

sukgentheina chu i tuaklo leh le ei gam ziang in le eima thok kham thil chuam chuam hung um ding ahi.

Kitaitetna ah pang, kichawl ziang thei ding hilo, taina mualsua dinga ko ah

um ihu a, i mualsua ngei ding chu Lalpa ei kineppina ahi. Ama lam enzing ah taina ah chun zawna um tei tei ding ahi. Ziaziakchun ei sunawpphak zosia chu pai thai tiu. A lampi ding ei hil ngala.

MUANNA AKSI PHUNGVUKTU THAKTE

Memorial Gift (Rs. 2,500.00 piate):

Nu Lhingniang, T. Khawvaiphei in a pawsal it tak (L) Pu Entinkhup hiatzingna in Rs. 2,500.00 a hung piai. Insung pa pen in a nutsia nung hih nu ginum takin a hung etkolna in Pathian in puihuai jel henla, tasam chuam lo dingin majawl ta hen.

Encourager (Rs. 1,000.00 piate):

Sep. Lamlalson, Changjal in Rs. 1,000.00 hung pia in *Encourager* thak a hi tai. A sepna mun ah Pathian in humbit in kaibat zing ta hen.

Sum leh pai ah i buai laitak um sek him ahia, pan thei chang, pan theilo chang a um sek hi. Himaleh, i Lalgam nasepnau *Muanna Aksi* poimawna hezing i um zing ziakun lungmuan a um chuam mama sek hi. Sum leh pai bep hilo in pauchapna ah pang zing dingin i kichial ui. Hotute apat article hing tak tak a hung um zingna dingin le pauchap jel hitiu. Chun, eimau lemchan hun hun ah phungvuktu hina hi le kuama ei piak hilo, eima kingaipoimawna ah mawpuakna nei ah ki ngai zingin pan la thak jel dingin ka hung chial ui.

—Managing Board

FAMTA PU LAMA THANGVUNG A CHANCHIN CHAWMKIM



Famta Pu Lama Thangvung hi, (L) Rev. Zamkai leh (L) Pi Kimneiting te gila ga pathum na ahi. June 20, 1940 kum in Phulpui khua'n ala pianga, pianpi pawsal panga leh numei panga a nei hi.

Ama hi mifel ahia, taksa leh thagau ah mi ettawn taak tak ahi. 1972 Kum in Taxation Dept a LDC in ala lut ah, 2010 Kum in Taxation Inspector in ala pension hi.

Kochuam lam ah a kimat nate: 1966 apat in Leisang YCO puitu in ala pang hi, 1968-1971 Phaidung YCO Block (Lamka Nuai leh Lamka Chung Kigawm) Secretary ala hi. 1969 in YCO Khawmpi a li vei channa Lapawl Kidemna na in Laika leh Mualngat kigawm in prize khatna ala lakpi hi. Ama hi 1970 Kum in Muanna Aksi Editor masa pen in ala pang hi. 1982 Kum vel apat khan New Lambulane United Church (New Lambulane, Imphal) a Local Treasurer leh Local Secretary in ala pang kha gel hi. 2012 in EOC Lamka Nuai Pastor Bial Committee member in ala panga, 2013-2017 chan bial Secretary in ala pang hi. 2018-2019 in EOC Lamka Nuai Pastor Bial Joint Secretary in ala pang hi. 2013-2019 in Leisang EOC apat in lay delegate (Khawmpi Palai) in ala panga, 2013 June apat in EOC Hymn Book Publishing Committee khatin ala pang hi. 2012 apat March 2019 chan Leisang EOC Building Finance Secretary – Treasurer in apang hi. 2019 March apat in tuni tianga hin Leisang EOC Building Committee Chairman in ala pang hi.

May 31st 1961 Kangvai Govt School a Zillai Day mat na ah, Zillai

Moirang Block (Tu a Kangvai Block hita) hawna a Secretary dinga tel daw in ala um a (Block Secretary Masa pen ahi). 1966-1968 sungin Zillai Manipur & Assam (Tu a Zillai General Headquarter kiti hita) ahin Moral & Religion Secretary in ala pang hi. 1969 February tha in Zillai Manipur & Assam (Tu a Zillai General Headquarter kiti hita) General Secretary dinga tel daw in ala um hi.

Muanna Aksi Editor hizing lai leh Secretary Zillai GHQ tuk kawp chu lekha zillai dinga thil haksa ahi ziakin Zillai GHQ Secretary a hina haisan in, Muanna Aksi Lalgam nasepna ah a ngai ziakin Editor hina ala paw zawm zawta ahi. Lekha bu hawitak tak bu thum let in ala sudawk ahi. Zia te chu:

1. Genevive Chanchin (Nivei kisua ta)
2. Thi him a lau puau (Cotacomb Martar te)
3. Juda Maktaduai guk sanga tam thattu pa
(Adolf Eichmann hawldawna chanchin)

Hun sawt tak apat a mit (eye) lam buai zing chu Madurai tiangin ala ki enkawl a, tu nai in Imphal ah a mit ma etkawl ahi zing lai in, a ngawng lam nuamlo sa'n Lamka Doctor mun thum vel aki zawt nung in phachuam ah aki hiatlo ziakin, Imphal a Shija Hospital leh Raj Medicity Lab Test Report (Investigation) ngak ah aki um zing lai in hung gim sia'n District Hospital Lamka puak lut ahin, etkawl na phazo ding daw na ziakin Raj Medicity, Imphal ah December 25 2020 ni'n puak lut ahia, ahinla, pha chuam talo in December 26, 2020, 04:40 Pm vel in, a khualzinna gam leh a ngai cheng, a insungmi leh Kochuamte nusia in a kumtuang gam dingin ala chawl tai.

A Laa Dawi diak te:

- ♦ Jesu Min Kinei zing hitiu (LTT No. 32)
- ♦ Lei nawpna mang ta un (LTT No. 314)
- ♦ Nisin in ka ngai hi (LTT No. 189)
- ♦ Keima Thagau hi dam dingin (LTT No. 221)

A Bible Chang daw diak: "La lunggil un Khrista chu Lal in koi un. Nangmau ah um kinepna chu min a hung dot ua leh, dawnhu thei ngal dingin, thunuaigol leh ja tak kawm in kisazo zing un" (1 Peter 3:15).

ECCI HEAD OFFICE TE LEH PRESBYTERY HOTUTE TAWH KIPAK THU GENKHAWMNA

January 12, 2021 ni khan Executive Committee member te tawh Khawmpi minin ECCI Head Office ah hotute leh Presbytery tin (EAC, ECA, ESC) hotute kokhawm in kipak thu genna program ala kineipi hi.

2001 kum tawp lam ah Khawmpi in buaina gen guallo ala kituak a, lekhapuan pek khat mai le neilo in office lua ding i hung hawl ua. ECCI Office ah ala kitailut a, Rev. Douzapao Haokip, General Secretary a hi lai ahia, ngaikhawk takin ECT Building ah room ni chu office dingin ei la phal piak a, mat kawm dingin almirah khat le ei la piai. Hiti chun, zia mun apat chun panmun hung khawthak in i hung kipua thak ua. Pathian in mit ah mu thei ah lamdang takin ma ei pui a, kochuam kipum khat tak leh huang phal takin ei hung siam a, kuama'n it le neilo in pan i hung lakhawm ua, eimau sak dinga kilawm lo khop EOC Secretariat –cum- CTC Hall chu i hung sa zo tau ahi.

Kipak thugenna hih a chuam mawng mawng ah ECCI chung ah hin gen lo thei lo ah ngaiin, hotu masate umlo nung hi maleh a dam leh semlaite hin kipak thu gen khawm poimaw a kusak ziakin zia program hih ala ki guanggalh ahi.

ECCI Campus ah Office ding room ni ila lua bep uh hilo in, Chapel le EOC Central Church te kikhopna in ala ki mang a. Chuleh a compound le Golden Jubilee matna in ila mang ua. EOC Central Church te gospel video album masa pen latna mun in le ila mang ua, camp chuam chuam matna dingin le ila mang uh ahi.

Zia kipak thu genna ah hin ECCI Head Office General Director room ah mat dingin sofa pani ila piau hi. Presbytery chuam chuam apat hung hotuten ei kipakpinaw thilpiak ei piau a, avel vel ah ei piaknau ahi ta, kipakna a sang mama hi.

Haksat lai ah kipanpitua a, pauchapna ah kidawtpiaktua ah i umnau jalin kuama tasam ngawi ngawi ah kinusia chuam um lo ah kal i suan khawm thei uh hih Pathian kochuamte umdan ding him ahia, kipakna a lian mama hi.